

三水縣志卷之四

文林郎知三水縣事閩溫陵林逢泰重脩

儒學古延州主 採分校

邑人文倬天編纂

馬三錫

同訂

王達可

藝文

夫文章者窮理盡性以究萬物之宜故王澤流而
詩歌作德勳立而碑記著嘉美起而詞賦集經濟
備而詳議陳觀乎人文以化成天下文之為用大

三水縣志

卷之四

矣一代之運宏且遠其元氣必發露於哲匠之筆
以吐其光燭典謨叶於禮風雅叶於樂文其國之
權衡歟幽自正蒙一序闡理學之宗天經天雅以
及八極發鴻寶之秘諸大文而外其序事方漢詠
歌方唐詳議方古名臣之敷奏不又一時之豐厚
疏達哉汗牛克棟不暇悉錄採其足以關乎政教
者志藝文

序

正蒙序

宋范

育

邑人 資文閣學士

張夫子之為此書也有六經之所未載聖人之所未

言蓋道一而已語上極乎高明語下涉乎形器語太
至於無間語小入於無朕一有望而不通則於理爲
妄正蒙之旨高者抑之卑者舉之虛者實之礙者通
之衆者一之合者散之要之立乎大中至正之矩天
之所以運地之所以載日月之所以明鬼神之所以
幽風雲之所以變江河之所以流物理以辨人倫以
正造端者微成能者著知德者崇就業者廣本末上
下貫乎一道過乎此者淫遁之狂言也不及乎此者
邪說之卑說也推而放諸有形而準推而放諸無形
而準推而放諸至動而準推而放諸至靜而準無不
三水縣志

卷之四

二

包矣無大可過矣無細可遺矣言若是乎其極矣道
若是乎其至矣聖人復起無有間乎斯言矣

創脩邑志序

明秦

渠

邑尹
臨清人

昔夫子慨杞夏無徵以文獻不足而志則彰往蹟宣
人文昭鑒戒備觀省者也是故建革之詳盛衰之狀
豐耗之由繁簡之制悉于志有稽焉則志之不可缺
也審矣三水夙稱巨邑未爲無志但代更于元運新
析于國初若往蹟人文之顯不惟爲齊民者百不能
舉一卽號爲儒輩亦有十不能舉一者矣省風稽政
能無致慨于斯哉渠自政暇輒欲模筆草就顧猶未

遑也一日咨於黌序暨邑大夫僉謂秦傳董尉田嘗
有遺稿未梓取而更刪之或亦存亡稽古之資也於
是遂命二三庠士及其猶子校輯焉復託綠窻文子
脩飾而潤色之蓋彰往蹟於什一宣人事於千百以
爲觀省之助云爾昔萬曆辛巳七月上日

創脩邑志序

明馬秉直

邑人
鄉寧令

穆皇丁卯歲邑侯崔溪南父母

士偉

以邑志久缺爰

借學博暨余兄生員馬秉正造尉田董氏

九疇

之廬

求屬志稿蓋尉田博雅冀可傳信將來也未幾溪南
值承重去稿且落於槩矣茲幸麓源秦父母

渠
視篆

三水縣志

卷之四

三

復因臺院之命謀諸署學事陳君

嘉言

令董生鑑續

厥叔藿草其校葺繕隲則付之陳生麟張生令聞楊
生有光余姪馬之晉輩而文氏運熙復脩飾以襄其
成夫研之歲月證之群籍質之輿論亦既可傳矣第
志史列也不易爲也矧僻邑新設文獻不足而創始
者恐難免羊芋之疑金銀之誤則三水之永建不朽
者果在茲否耶是志也實始於庚辰冬十月訖於辛
巳秋七月上吉之日至若華麗精潤以盡詳焉須俟
後之有博學者

舟翠樓紀咏序

林逢泰

晉江人
邑尹

余少誦詩至幽風竊嘆周家八百之盛始基之矣吳
季子論樂云美哉蕩蕩乎樂而不淫洵非誣也迨承
乏茲邑身履其地跡其山川原隰與篤公劉章合攷
邑志又所稱膏雨之郇伯者恒在于斯而流風遺俗
猶有存焉第兵燹以後瘡痍未起城郭榛蕪滿目蕭
然且瘠土之民稼穡外無他謀如七月所載蠶績諸
事邈焉難追僅陶穴風景不殊耳余竊以爲憂謬欲
舉百廢而興之媿弗逮也迺捐貲鳩工先葺出政之
堂額曰思輯志復古也嗣自城垣戍樓爰及泮宮武
亭漸次茨塹一時煥然耳目益勉循職業固守封疆
三水縣志

卷之四

四

非徒以肅觀瞻已也若夫舟翠一樓面山帶河懸崖
幽广之中廓然大觀雖鷓鴣一枝而氣象萬千固已
具豐鎬之槩矣於是邑之人士偕來遊者咸顧而樂
之登眺歌咏各盡其興致所至或云猶幽人之頌余
則何敢然余喜夫彈丸僻壤風雅弗墮則雖公劉郇
伯之業不可復覩而撫今追昔其亦有樂而不淫之
遺意歟寧直屏山汎水增一佳話也耶

林邑侯萬民頌序

文倬天

邑人
衡州府推官

周官屬邑正於地部分十有二事以登萬民政令徵
比各趨其稼而賞罰之佐司農以效田里掌獄訟移

執事輯民而裕國上輔君以萬季之治久於其道而
天下化成咸頌岡陵於不衰也猗歟我 侯蒞九原
允陞掬心花以協輿情者晦而列之其腹肺而達之
以情弊而釐之以澆五比四閭頌躋厥公堂稱萬壽
之醜焉今揆度以穉仲三祝而介壽其壽以朋酒乎
抑沐成功以孔渥矣邵子經世以穉爲昊天收物之
府白藏秉令犖斂乎萬顛穉犖也陰陽升降於其中
而聲詩應之詩象乎穉聖人作禮樂以收民之性情
故昊天以時授人聖人以經灑天天人性情之理惟
詩得之康成論詩以五際而辰天門卯天保午采芑
三水縣志

卷之四

五

酉祈父夷明赫考天心以扶王道莫大於四始則成
王之詩獨見之豳風元公擊土鼓而罍之逆暑迎寒
祈季則飲以樂峻蜡飲則飲以息物布德施化詒穀
於千春我 侯續詩以理豳邦政邦教邦事已綴陽
穉入天保而出采芑丕肇造三泉兩澗以無疆哉三
泉以原陞交錯而爲豳禹貢稱原陞之野正以道其
險僻側蹶之地形界入公劉之幘境絡古公之鄉豳
有九谷而邑當其中爲陶穴之奧區下者依陞爲穴
而居高者鑿地爲阱以處阡陌若懸於天際土脉疏
惡而徭糧浮於周藪大邑之右兼以韓祿紅倉所增

猶胥所稼賦之煩憮幽悉罹之前尹雖豁其半而兵
荒薦臻流庸者衆侵田沈斥又詒貲筭之案以五千
計我 疾勤恤民瘼豁包賠以一千四百有奇而繼
以三千三百請者無稅之供汰磽鹵而除之俾閭左
不瘁於任罷公務不匱於納結者幽之田里衙副其
箚歛然樂以嬰始而邦之政以成兩澗之烝庶自作
不典違行之訟至以軋餼之誓而陳臬事者或鈎尾
射影者有之或虎攫鶉奔者有之或豪右奸宄者有
之其民日益詭情日益繁眎漢之用九六以四千九
十六倍焉我 侯澧周官五聽八議三宥三赦之制
三水縣志 卷之四 六
肺達而嘉平之欽恤而時予以不痺之澧聽訟若筮
不翅五情之覆爲發也卽險健罔金矢之入以迪之
於棊爨之率又格厥無良申厥嘉師幽之獄訟平允
斤斤必卽天論郵罰麗於事則頑梗自化而邦之教
以成周禮曰土宜之澧辨名物以相厥宅以阜厥人
自陟岡觀京以來虜廬語言之攸芋歷有季所况兵
燹之逸師水嚙其南隍震風剝其北櫓星日歟止旅
之堂而茂草鞠象璜之宇繁宣者每仰并王以却步
焉我 侯周咨以坐照睇此公堂不蔽風雨僉謀及
衆卜休恒吉公旬不過三日焉其完雉堵自于橐先

倡之而垣之陋者則濶圯者則蔭四圍悉如所規麗
樵輦飄煥然一新而舟翠雄峙乎南岡且篤文翁之
化繕及泮宮自大成殿以下載曰其楹載華其楹拓
茅築墉鏘鏘被於路而演武公廡又續舉之俾幽之
執事二十九載所不廢者全邑騰輪囷郁奕之光而
邦之事以成書曰三季有成虞典又謂底可績以三
載則天地人之交備於功滿之穠不足見德音之不
瑕虜皇極範德維三負天而跼地者詔臣節其福徵
五冠之富壽而又以攸好列福四茲所爲書人以訓
壽者也我 侯治幽三季董厥政教事如夙具樹利
三水縣志

卷之四

七

拔害登春臺而山火爲賁憇甘棠而角牙自戢豁荒
甦流亡之命葺垣衛順宣之氓崇五土而備四善以
熙成功豈特應昊天收物之德耶親民以大表能指
日太史采風擢七事及五事以上貢朝書名於陞柱
野勒績於山巖銀魚緋衣洽文德於四國異佐乎
天子萬季也

碑記

李邑宰沐德政碑

宋無名氏

蓋圖縲綫以繫獄峻鞭朴以繩民法尚嚴明政必慘刻民未得而治也惟以德爲政黎元向化敬之如神明愛之若父母矣三水巨邑戶口繁息訟獄紛擾倘若不以德則越訴於郡牧監司不可勝數李公騎尉以德望素著來尹於茲興滯補敝衆務脩舉晝無橫民夜無犬吠百里鎮靜號爲大治邑民相與繪公像於圓寂院榜其堂曰愛慕求僕爲記固知其名難稽昭出自民口不欲更去一日縣尉田臯謂僕曰公之

三水縣志

卷之四

八

爲政以德懷民豈止一端而且愛慕之稱非特不可名亦未盡公之事也蓋更改其堂曰德政子復爲我詳言之欲形於琬琰以垂不朽之傳僕素不能文何足以興於民乎公之德皆耳濡目擊姑撫其實以論之將備作者採補焉自公下車移城門以便出入則氣象壯觀不患跋涉建營舍以備守禦則外攻不入暴賊遠遁城隍祠宇旣敝而再新橋梁市衢已壞而復葺建行祠脩官舍興作鼎造不爲私計規畫之勅立不使計日以告畢是有德者之所能爲此也奸蠹一投於前灼見情僞此公之明德也哀矜死囚掩葬

遺骨惟刑之恤獄無淹滯此公之仁德也激貪勵俗
稱爲清白其廉德如此簿書山積必躬閱校其勤德
如此夫德得於已爲德施於人爲政公之政事無非
一德今以德名不亦宜乎是爲記

馬邑宰宗仁德政碑

明李

錦

郡人
御史

弘治辛亥四月念有一日三水縣儒學司訓朱璣命
生員白瓚謁予雲山小居賓主禮成揖而言曰成化
戊戌制析淳化之半置三水縣將一稔新樂馬公來
知縣事前之爲縣者率以邑新設又皆不久於任因
循苟簡自城池及百事悉草創公旣至勇於有爲即

三水縣志

卷之四

九

括賦役詢風俗察淑慝審利病循阡陌議興作凡事
干已任者爲之若饑渴一以愛人爲主更以學校治
化所關規畫經紀飾新廟廡構建齋堂俾展祀式虔
肄習有所以田桑衣食所出巡諭督責開荒除蕪時
耕時穫使上足公賦下贍私口謂保障必恃乎城隍
不及期而城隍告完謂賑饑莫先乎儲積不歛民而
儲積已富申飭鄉校留心於禮教畢功壇遺致謹於
神祇鑿渠堰水人蒙灌溉之利設警弭盜境無剽掠
之虞藩臬行司縣治廨宇莫不稽於成憲旣完且美
芟刈強梁撫字良善招徠流亡柔懷無告催科不擾

刑罰適中凡是皆公鑿鑿見諸行事者其他良法美
意不可殫述至如廉勤精敏又公天分之自然也既
而又曰公名宗仁字本元世爲新樂仕族祖諱謹天
順河爲監察御史歷陞都察院左副都御史公自幼
秀爽不凡都憲公獨鍾愛之遣克邑庠弟子員以學
行大脩遂襲都憲公廕卒業成均拜今官惟瓚師生
忝在下風薰灼德化且覩邑之事出草創者今皆規
模完整條理畢具三年之間政績之舉如此將來之
善庸有既乎敢乞懿文記諸貞珉用托不朽用激將
來實亦邑人之志也瓚等特率先焉廼再拜予起而

三水縣志

卷之四

十

應曰古之治人者必先明乎明德故有虞之世其用
入也必三德而爲大夫六德而爲諸侯蓋以官之崇
卑視德之大小也洪惟我明建官惟賢必德克於在
始授以官冀推其得於已者以施於人也士或有德
不足而幸得祿秩亦不旋踵而取敗若馬公可謂以
德受官者歟夫官之切於民者莫令若也上以一邑
之民付之令好惡休戚固將目擊而身體之使遂其
願而不加之以所不願以仁之也仁之術其施有緩
急焉使馬公之爲或施於已成之邑故習之民雖皆
以德行乎其間其急且繁亦未必息人之議也然而

施於新析之邑新理之民乃政之當急而不可緩當張而不可弛斷斷然有不容自己焉其於爲政之次第固義之所在也義且仁非德之所在乎推是德而達之於政若火之始然日熾月盛方殷而未艾也然則馬公其賢矣哉宜爲士民之所表著也以繼自今四方之士及將來蒞政於茲者或有感發而興焉將必宣上德立爲善政俾人人蒙至治之澤享雍熙之化矣仁覆天下有不在於今日乎唐虞之治又何不可企而及哉瓚曰然遂記其說使歸而刻之於石

林邑侯重脩文廟碑

文倬天

三水縣志

卷之四

十一

禹貢原隰之野是稱幽九原九隰而錯以成文則一經九緯之幽不以上接虛良蒼華之敦乎其地絡本於子午嶺自北以南首乎軋以大成而峯峙連山之良水通歸藏之坤爲聖文之總萃其天文則應帝魁之一星而戴匡文昌六宮昏建華山以西爲攝提之所貞茲其發天地之房自夾皇遡過宜廣開文運以綿聖功歟故公劉陟岡而爲廬舟王以臨丘巘依京而定制酌匏以立君宗俾踰濟者造曹而式化其郁紛輪囷之氣允後世觀文作人之數也是於幽學之講堂當之柰歲遠宮圯鞠爲茂草而望素王之容

者無起色哉 侯至自閩三异之政有重泉璜歌吉
而鳩工凡攻木飭材必于橐先備之煥謀厥衆自序
師臬紳士量力以捐有差等辛亥之龜經始大成殿
子來罔恃乎鑿鼓及冬而載度其楹載華其楠冠雲
榮縱不翅鳥革翬飛之翼翼也嗣壬子新兩廡而丹
護之矢棘正啓聖之祀殖噲肅敬一之亭有仇者置
戟其闈門翼兩祠以宦以賢其中阿將將表以櫺星
者應門也斲之礪之加密石焉而鳳之軒翔蛟之連
蜃以雙標於左右輪奐之美廓蒙而昭發之甲寅又
相中唐塏爽濟池以瓮半天子之雝而泝之清流環
三水縣志

卷之四

十二

璧采芹廩思樂之風公宮就陽樹槐開論義之市前
五雉而坊經涂之軌者顏以太稊元氣其大道大德
之表以歸靈光適風水之渙享以立廟之遺義乎哉
侯定中揆日而告成以三年都人士思饒功於不劫
請倬天爲國言曰雍州原隰底績即公劉所度之者
其原可以行徹田之澆其隰可以收流泉之利原陽
而隰陰陰陽各九交錯爲文應天地自然之易其山
川隆結於子午艮山而坤水四時之所交風雨之所
會幽實據輿區矣先王建國制學叶三靈而敦五土
惟制作定世符之時聖依之聖者人倫之祖爰葉萬

所造命以玉燭成歲功聖其總一歲之時也其四配
可分當一時故復爲青陽宗爲朱明述爲白藏亞爲
元冥又閔以麋解冉以泉動至子石之可年者當斗
一南六陽之候馴赤輦之不可年者當日一南六陰
之候三千其門庭而升堂通六藝者特七十二以當
七十二候乎揭聖宗而翼天統以齊七政之王衡不
揣望崇儒論道之我 侯哉侯曰漢太常之議謂三
代崇化以風四方莫先於學春干龜羽夏絃冬誦太
乎之原也及唐咸亨五月造學以敬儒宋湖州千人
立教於安定或起璜宮或聚生徒采交州之磬繪城
三水縣志

卷之四

十三

南之圖國淳俗樸鏘鏘被於道而六路咸秩遐哉其
可風矣約之椽之其有事於幽璜拓茅築垣始於困
敦成於攝提有恤之宮曼頤以若萬民諏所作者則
林侯諱逢泰閩之晉江人庠師王諱採陝之延川人
象幽之子矜王名相之王名光烈許名桂張名候也
爰穹伐以饒而銘之曰九原九隰合乎易連山爲峯
歸藏爲液子午之龍結磯吞陰陽錯文應采芹以半
璧誰作璜宮孔曼以碩我侯成功在攝提格

剗脩城池記

明李 錦 郡人

三水古幽谷也山環水遶地形完美周人基此以開

王業秦漢隋唐皆爲近畿大邑此蓋圖志之可考者
也有元至正十有八季移置淳化縣始廢明因之成
化丁酉居民思復故邑上陳制下仍立三水爲縣從
民便也壇社廟學官署廨舍悉如成邑惟城池門堞
則歷十有餘祀經兩尹而未及建焉越丁未新樂馬
僕奉命來知縣事將期月紀綱粗布重念城池爲保
民之具王政之所不廢且知民可使而力可爲也乃
謀及有參相土度工經畫財用從事土木壯者借其
力富者勸其財工惟其巧農適其閒程以日計者若
干以工計者若干泉以緡計者又若干城之制周圍
三水縣志

卷之四

十四

五里五分有竒豎高三丈濶減丈之尺上樹以堞城
之下濬而爲壕深丈有五尺東西溪水復依壕而注
之四面咸闢一門門之制以土爲胎則甃以石以木
爲骨則護以鐵圖亦固也門之上各建一樓表瞻望
也功始於成化丁未十月迄於弘治戊申三月落成
之日官民胥慶巍然爲一邑之保障真可以捍敵而
禦侮矣然是役也地勢崇卑率因舊址戒事成功悉
倣周制就利避害咨謀僉同及慰勞督勸則盡公之
力而人不與焉吁功成而民不勞費裕而民不怨侯
之賢勞其至矣今季春侯以築城之役雖涉分內而

邑之新復亦當托之金石以昭示後人也廼走書敝
廬丐文以記之余惟昔孔子之作春秋也一城垣之
築必書于策雖以勞民爲重而下陽虎牢亦明其有
不可不築者蓋古者聖人之垂訓必兼盛衰而立法
世不大同官天下者旣不可得家天下者亦必以城
廓溝池爲固故世之欲禦患保民者亦不可不以設
險守國爲重務也我國家以文運綏太平百有餘季
申飭儆守而於城池之備蓋惓惓焉其亦古人保民
致治之至圖也今馬侯筮仕之初獨能以此爲務亦
可謂深知爲政之體矣不亦可嘉乎侯名宗仁字本
三水縣志 卷之四 十五

三水縣志

卷之四

十五

元世爲新樂望族祖諱謹正統間由監察御史累遷
都憲出撫河南風裁著於天下至今人慕之然則侯
之爲政其亦有所自耶或曰馬侯之爲縣也未三載
引西溪之水通流縣城人獲灌溉之利完逋負之稅
致其復業戶有增羨之美扶善刈強興廢起墮善政
纍纍下安而上獲已膺旌勞之榮是皆可紀者也豈
獨城池爲然哉余曰隋涇之碑循良之傳事固各有
專主也余非隱人之善者特不敢諛且濫焉或曰唯
遂書此爲創脩城池記

夫祀爲國事之大者若城隍廟祀護祐一方保障四境義兼神祇又祀事之大者也

太祖高皇帝洪武三年正月詔定天下城隍府州縣有公侯伯之異稱而俱爲顯祐伯者蓋以鑒察斯民靈祇斯土也顯則威靈丕著祐則福澤普施三水縣五代時或屬隴或屬耀元至正七年省入淳化縣屬鳳翔府邠州明因之成化丁酉都御史余子俊馬文升奏復三水隸西安府邠州弘治三年知縣馬宗仁始創斯廟爰脩祀典殿宇門垣遵詔旨以重民事者也宜曰三水縣顯祐伯城隍廟以都祀事也夫祀以

三水縣志

卷之四

十六

備物齊禮爲豐禱也邑之鉅姓思榮官馬致遠及子生員秉正知縣秉直自備銀粟鳩衆紀善喬濟民生員趙元卿等建立獻殿五楹以稱報賽之陳奠也時嘉靖十三年五月知縣廣漢張珩樂觀其成而獎勸焉馬致遠嘗遭疾夢城隍覺而愈欲崇神貺於無已也於三十六年遣二子詣羅中丞廷繡書城隍大廟飾以金碧供上之以彰神明之真境也知縣吳之翰嘉賞之於四十四年令道士化鐵鑄烟樓一座以爲香火之需大磬二口以爲啟叩之助儒學訓導郭聘有記以載其盛於隆慶二年見廟門直衝徃來冒袞

銀物共二十餘兩同馬化龍出銀十兩建磚樹塞
一座以顯靈崇望殊爲壯觀也於五季見司屬未備
又同邑衆各輸銀木建東西司房一十四間具神職
也於六季三月見各司神前香火離陸又置石鼎一
十四供朝夕祀享也夫治神宇以完美延歲時而弗
替前後樂輸約千百計使廟貌嚴肅卒克祠祀嘉祺
之美顧不善耶若思榮官輩可謂至誠感神精誠不
二者矣宜其享純嘏而綏神社云隆慶壬申春二月
予將入汴過其邑親覩其迹因述之而爲是記

朔脩牲所泮池記

明文在茲

邑人
庶吉士

三水縣志

卷之四

十七

蓋聞爲政有建置詎飾觀省哉乃牲所泮池將明禋
而廣游息咸藉乎此則尤典之不可缺者故詩咏思
樂書紀惟馨厥有旨也三水肇自成弘朔建聿備嗣
是歲久頽壞人思鼎新遂令崇任堪輿家言遂移
廟學於縣治之東南隅爰更行臺而爲之頽地僻狹
隘漸就卑濕櫺星門外鑿池其南引流灌漑以瀦泮
水已而桂蒿叢生蒙土時取汲其下春秋享祀結棚
於前以省宰牲牢哀鳴躅躅殊非祗薦之地矣邑侯
周清翁蒞任以來迺慨然曰天合者士之表而神
之依也頽缺廢如斯奚以歆神而作士遂捐俸就工

甃以磚石中通以橋甫踰月而竣事復規度于泮池之西構地一區廣袤胥數十武繚以垣墉宰牲於內庶嚴餼可遠而昭薦致潔也神廟制而士咸悅其在斯與然公之創置不寧惟是移費門以飾輪奐新三汲以固扃鑰整燕思以便裁決更迎賓以廣延訪葺明樓以達聲教至於公署吏廨罔不煥然諸凡營繕殫罄心力而民不知擾茲皆昭揭衆目而績莫揜者若夫綜理周密政教聿新自有口碑載道固無俟余之喋喋也公名克字仲美清泉其別號世爲古宋栢城人萬曆庚子孟冬之吉

三水縣志

卷之四

十八

飛雲洞開路記

明文選熙

邑人參議

邑之東二十里有洞名官家古矣河環一帶之流山峙萬丈之巘石竇鑿其中高高下下參差於巖岫間者縣亘百里志云避兵而作也縣尹御史蕭居焉棧道連雲石梯落霞網戶萬啟星窓千開真幽之第一勝槩也柰歲久路湮不可階升故景雖奇而未著聞者遊觀稀也邑之民李福趙介欲闢其路令僧真普請命於邑侯秦可之作簿丐緣官捐其俸民輸其財鳩工數十以董之石以爲階就基也木以爲檻防什也邑之崇神者繪諸像於各洞中以壯觀焉肇役於

萬曆己卯五日落成於庚辰陽之杪上吉日余以歲
皆閑暇爰約金蘭徐步以遊則地不殊曩景益增新
卧被大虛之雲起鏡東岡之月風雨驟來空谷播絲
竹之韻露霜偶凝庭宇砌瓊瑤之階若玲若瓏而八
萬三千之戶不殊金樞如拱如揖而七十四回之遊
有同峻院或巨靈劈山之斧削就抑五丁開峽之力
鑿成日車駛於穴中雲衣生於石上易其名曰飛雲
允於洞爲不誣遂之探勝尋幽者見桃花夾岨知有
問津之人望麻飯常流不負遊仙之夢覽斯記也不
與歸盤谷之文遊赤壁之賦有同志者哉

三水縣志

卷之四

十九

聚珍橋記

明張拱極

邑人

周禮合方氏掌達天下之道路津橋相輳不得陷絕
故天根見而成梁慮民病涉也三水城西數十武許
溪水自北界來帶縣而南其東西岸距城廓間甚當
衝也歲久滋深溪流滂沛行步齟齬足脛瘡疥而攸
往罔利矣對峯馬君常遊於此愀然嘆息謂鄉耆杜
氏綏曰川澤之阻則橋梁之便民事也此司牧者之
責耳廢弛玩愒漫不葺理非予之任而誰耶蓋避嫌
者牽顧慮之私而因循者憚經畫之勞卽廟廡學宮
敗垣殘宇草礫相依犬豕交跡莫之問也而况於此

橋乎廼捐金暨米穀若干責邑民之能幹者數輩若
許世經李乾李艾等委以經度物優其價工優其值
甃石爲骨畚土爲基歷數月而橋成馬君遣幣索詞
於予予曰鄭子產以乘輿濟人於溱洧孟軻氏尙譏
不知爲政單襄公知陳之必亡亦以川無梁也橋之
係豈淺鮮哉君以明農之身毅然當之乃爲司牧者
所未爲則其德惠之及民豈徒見於尹鄉寧時已因
是悉君之存心矣是役也經始於萬曆八年二月二
十五日落成於九年三月十五日其衆輸若干所費
若干不具述惟述豎橋之意利民用用著君之績君

三水縣志

卷之四

二十

名秉直字養浩爲予如親筮宰鄉寧政聲藉甚其先
君雙椿翁暨若兄南峯以高致慕義無窮凡邑內廟
觀多所創脩故君之率作厥有所自云

遊煖泉記

明錢若愚 邑尹

三水之西有煖泉雖亢旱不竭涸寒不澌故謂之煖
泉一又謂之溫涼去城一里許北向而入有微逕過
柳溪數十武兩岸如門磬折而入又數十武始陟其
麓登少壇寺寺岑寂無僧惟蘭若而已寺之左右一
二居民陶復穴居蓋邠之遺俗也迤西又數十武拾
級而上山愈峻徑愈仄童子盥之乃克登至此蓋

休矣俯視溪流微渺如綫因度之曰此泉之末流也
諦視湍湍然感沸之盡矣徐聽之水聲嗚咽洒洒然
如風雨聲又徐而觀聽之飛流觸石琤琤然如漱玉
聲此源之將窮處也既而天日開朗石隙瀨洞溪流
滂沛閎中而肆外瀉出於兩山之間者煖泉也掬飲
之味甘冽訊之故老云飲之能消渴疾祛煩暑且宜
釀茗民之爭引灌田走畦可數百畝此泉利用也仰
視之懸崖瀑布疊流貫珠飛翠沾洒清冷逼人咸思
挾纊矣積雪未消冰山在目宛然一瓊島也皆噴噴
賞予曰噫嘻此釀泉之亞匹也予西過滁滁人共遊
三水縣志

卷之四

十一

釀泉之盛今觀此是亦滁之釀泉也愧無醉翁者以
當之耳於時草木叢茂禽鳥鳴集惠風徐來人物熙
暢因與益齋陳子綿江王子竹軒于子喬生濟民張
生騰霧萬生順寧李生子元例官張祿暨厥子騰蛟
輩環列而坐戲以木卮效爲曲水流觴之飲溪凡九
曲殺以三級命二三童子置杯上流信其所止而飲
焉又慮其譁也乃設罰其間置一豆觴以恐之曰其
勿譁時薄暮弗暇爲詩又作爲小令使工人歌以侑
勝任其音節之短長而止焉聲已而杯輒至由是咸
弗勝飲者矣酒旣古泉子歌之曰泉冽兮淋浪酒馨

兮泛瑤漿飲且樂兮壽而康安得惠吾民兮澤四方
歌既衆相稱賀曰今茲之遊亦是蘭亭之脩禊事也
惜無有能者以記之耳予乃嘆之曰二子已矣徃事
已陳迹矣然釀泉雖以醉翁勝蘭亭雖以右軍勝樂
故在人而今茲之遊安知其不古若耶况愛慕者以
心而不以其情與景遊豫者以時而不以其
也夫人亦惟識其先後之殊各適其樂耳安恤其人
之徃而迹之陳哉予于咏歸之際敬述之以爲記將
以告夫後遊者

高邑侯創建通堡石橋記

文毓鳳

邑人
武城令

三水縣志

卷之四

二十二

維我邑峙鹵極之幽實惣三陲之吭八水之門庭也
茲者流寇依爲出沒窟每嘆防守之難爰有縣之右
翼曰西堡與城犄角立廼古李思齊屯兵舊處離城
僅一水隔誠唇齒之要壘也我高侯暨闔邑紳衿僉
議墉壑增脩深溝高壘爰建一石濠通有吏則聯堡
以衛民無事則丸泥以自固甚盛舉也於是準地程
天鳩財窺日版箋肇興揅喫趨勸疾蚊捐俸金近百
兩給巨厚逸士庶家咸輸乃貲齊乃力斲屢厥舉焉
凡一載餘而功竣報當此三空四盡萬難措手之候
未嘗并日課功刻脊責辦而壕塹倅爾立津梁倅爾

起匪侯夔民之苦心形之董率民諒侯之至計竭之興作烏能觀成若此哉自是或有侵或而城藉堡堅堡藉城固則民弗苦寇螫或有道調而丁賦禦城婦女詣堡則民弗苦兵難或有惶霖而緩急可由城之堡亦可由堡之城則民又弗苦水怒一舉而三善倭焉余於斯橋亦云謹志之一片石崇禎壬午仲夏朔旦

續脩泮池記

張 傑 邑人

三水之學宮自有明成化十六季重建邑始而泮池之遺址僅存巔末無徵世代更移鞠爲茂草焉幸我

三水縣志

卷之四

二十三

邑侯林父師以八閩雄才家學淵源承

筍堤夫子之志於辛夷中秋慨議葺脩凡尺木片石悉先出諸清俸而紳士之捐各有等經營三載費約數百金不取民一粒而輪奐更新焉獨泮池未濬采藻無聞不幾九仞之一簣與侯忝居門墻思續其事而始終之謀及同社咸欲助力寅夏訊吉濬厥舊址甫及泉而石碣出焉乃前庚子詞林文先生太青文夫子創脩泮壁之始末也越七十五季而又一新礧石爲底甃砌以磚中通以橋庶乎思樂可咏而青珮得以觀光功竣之餘議樹一坊而慮苦不貲 侯引

爲已任仍捐十餘金棟宇榱桷各如其式于今城闕
不刺而羣屏對峙爲文教地伊誰之功嗚呼我
侯崇

聖尊賢之意固後先濟美矣而吾邑人文之肇興其
在斯乎俛末學小子監役三載幸無隕於厥命而前
輩之志亦賴以彰也因勒諸石以誌弗忘云康熙乙
卯夏五之吉

議

減糧議

明文翔鳳

邑人
光祿寺少卿

竊照三水之列於次疲而以八分考成也蓋從來矣非自近年始也使地真有八分之出而民力果足以辦之則四十年來何無一年登數者將民之肌膚非肌膚而獨甘受鞭笞斃命於比較之限期乃至以身質升勺耶糧冊之按年而查曾完及八分者何年乎以八分如額而考滿者何官乎屈指二十餘令豈皆罷軟不善催科之官其以民易官不忍鞭笞人者耶即才之最武健者亦未見邀考

三水縣志

卷之四

三十五

滿一典即他官之別以治行處而問其所受病之由則皆以逋賦爲主而姑一一聊借名以點綴之耳真可爲百姓流涕真可爲父母扼腕而本官生於其地豈忍日見其民之破家失業而道路目之又日見其令之棄官以去而兩相安於無可奈何之地不爲一控陳耶三水幽之谷也界近公劉之塚境有古公之鄉自昔稱勤而不怨之風也按幽邠二字皆以文故謂之幽而禹貢謂之原隰之野正以道其險僻側蹶之地形蓋海內惟有此一區地特苦高者爲原下者爲谷幽有九谷而邑當其

中三谷則其陶復陶穴之隩也墜者依谷爲穴而居原者鑿地爲阱而居自隰而仰高數百尺者山也登之則田原而爲四鄉之郊阡陌若懸於天際自原而俯則深數百尺延袤輒十里而探之則有穴居之民城市實建於地中其崎嶇之坂樵牧之所不至者盡坐之以糧寃哉安得仁人之枉輶軒其地而臨之卽查盤者偶至邑止見其鄙陋蕭條之槩而愀然垂襟然其深山窮谷之狀亦安得一一入歷覽中倘按畝而問俗遵穴處而叩其不樂生之情有不隕淚欲亟爲引手者耶其拔刃斬

三水縣志

卷之四

三十六

案而不惜一筆之勞爲萬家甦年年世世之命者恐不待辭之畢矣三水之名始自漢書其後嘗以淳化并入三水矣元至正十八季則又以三水并入淳化矣至成化十四季而始割淳化之十六里而爲此邑至弘治五季而卽見其壤力之不逮遂并而爲十二里矣東九十里而界宜君南五十里而界淳化西四十里而界邠州北五十里而界真寧地不踰數千頃糧二萬二千七百兩至浮於秦川大邑之右其地糧有起科者有原不起科者其所以受病者蓋有說自嘉靖元季奉坐單以何所

不起科之糧一千四百七十七石餘者改派韓府
祿米每二石折納一石每石價銀八錢而歲增添
五百九十餘兩矣至嘉靖十年以寧夏蘭州紅古
等倉折色三十七石每石折納小布二疋疋止直
銀一錢五分者改徵價二錢五分而歲又增添七
百四十餘兩矣嘉靖十六年以邠州秋糧濶布一
千三百十九石石原徵價一錢五分者改入固原
州倉使屬邑爲州民包賠而歲又增添七百七十
餘兩矣嘉靖十七年以本司廣積庫佃糧所召人
承種荒地者四百八十四石石原止徵銀五錢耳

三水縣志

卷之四

二十七

又改入固原州倉每石徵銀八錢而歲增添一百
九十餘兩矣嘉靖二十年靈臺縣積書蕭錦臣偶
因災傷朦朧捏告以蘭州倉折色五百石換入固
原州倉每石徵銀八錢而歲又增添一百五十餘
兩矣節年增至二千四十餘兩而控贖竟莫得伸
則縣誌可一一考也蓋當時彈丸小邑科第未開
無人爲之陳情而一切賦重無端更加則邑之不
可爲蓋久矣其後萬曆十年以地畝之科不均而
有均丈之令無奈均丈者之不克力行而反以重
之而民益病蓋公差丈手入山丈地地無以供

酒食故未敢從之踏丈而此輩怨其饑疲之無麻也遂有用繩隔溝扯丈者有繫籠貯石墜落溝坡而丈者以峻嶺窮岩無疑足之地皆妄報之以爲地遂大增山地之數而實無地一報官註冊而卽莫可辨說也大寃也其丈者爲邠州馬判官刀筆起家旣未嘗按視深山遂憑報冊量地定糧見其所開註尺丈之塊段大者卽註以高等上地一體加科而無地之糧數又增矣尤寃之寃者也此四十年來卽八分之所以必不可前也原地十之三四山地十之六七地寒而燥歲止一料豐年畝止三水縣志

卷之四

二十八

收四五斗中年畝止收三四斗凶年則一斗二斗至山地則陽地多枯死陰地又不生苗而暴雨則崩塌者歲相繼况堪凶歲乎其地四境皆深谷不桑不麻不綿不織紡不商販而無可易銀以辦納凶則無粟可糶豐則無慶易銀而粟價騰涌賤不得售至每銀一錢糶麥豆至三斗外穀蕎至四五斗外糧未完而粟已盡矣况敢問一家之口食與禦寒之衣絮乎至今而如太義里則四甲五甲盡逃絕無一户也蒲村里則一甲盡逃絕無一户也三水里則七甲盡逃絕無一户也其他零丁戶口

逃亡者至不可勝道而所遺之逃地則闔里包賠之地之所入曾不足辦糧之半至欲以地白付人而莫可推止得世世賠納年年推委家家洒泪而已各爲十二里而按其戶口實不滿七八里也以供二萬三千兩之賦究哉其能勝之乎地之價賤者畝不過一二錢其無價送人而不受者大半其邑之大姓之家所聊生者尙不逮秦川諸邑之奴傭而谷地之苦雨崩塌者其災傷又無可請訟如邠州遇有水崩沙壓之災則得自開豁而本縣則竟不得援以請也其鬻子鬻女者每比限卽有之

三水縣志

卷之四

二十九

其全家連逃終身不反者每歲卽有之其每限之斃於比較之鞭笞者又誰爲憐之而縣令又盡以參罰去是以十年計而署篆者在任之日常倍於實授之縣令近時至有二年半無縣官而選多不肯就者長此安窮不縣將至於無民民將至於無官乎則亦仁人之所未嘗聞不忍聞而想樂爲之聞者此亦窮則變變則通之日也其往年之增添者旣年久相沿而未易革其均交之增糧者又未可率然議改其原地山地之不一律者又無專恤山地之良瀆使不參差於一境之紛爭則惟有議

改次疲爲上疲而寬八分考成之澆減之如六分之例庶民不至盡化爲逃亡而或可全一官耳况歲增遼餉四千七百是且二萬八千金矣有不至民日盡地日荒者耶按雍州黃壤之厥田惟上上者則今涇陽三原高陵富平咸陽諸邑是皆樓櫓相峙桃李成林望之如烟海真寸地寸金矣而糧各不踰三萬餘三水何地可若是班耶漢中一郡轄州縣九最爲關中善地是魚稻之鄉也而糧止二萬餘乃使黑子福邑獨當一郡之全是百倍之苦也雖欲民不日盡亦勢之所必不全而

三水縣志

卷之四

三十

上臺不亟爲調停恐三水之爲三水不數十年而民又亡過半矣又安暇問官之去留乎茲闔縣百姓數百號哭赴告臺端恐格眼狀式不得詳控謹條布以聞伏祈臺慈垂鑒批查核議如果于民瘼不謬仍祈題奏謹揭

函防議

三水同官耀州者畿輔之藩也寧州真寧宜君者又三邑之藩也盜自三水入者十之七自同耀入者十之三榆林定邊之直子午嶺而下也中部宜君之徑子午嶺而西也皆會於劉家店子卽杜詩

所謂子午關者而一支可自馬蘭直入同官一支
可自馬蘭直入耀之柳林鎮一支可自馬蘭出三
水之石門關是馬蘭其一扼要區也而馬蘭河卽
吾三水之水源可沿川直至縣然谷側蹶近未有
繇此者劉家店一支又可自兩女砦直入三水之
職田鎮則劉家店又大扼要區也而防者宜防此
以過其入勦者宜從此入以從其所歸落此東盜
之概也故宜君寧州真寧之衛嚴則三水同耀靖
三水同耀之衛嚴則涇陽三原富平又何從受兵
耶余生長中幽少嘗北至慶陽西至鎮原東至山

三水縣志

卷之四

三十一

河鎮石門一道又其所屢出頗諳其要地之防特
出胞中粉本爲此議以代抵掌群公可據案而坐
策耳嘗謬爲四道會勦之說欲以慶陽道駐寧州
鄜州道駐宜君守道駐耀州巡道駐邠州以一府
廳駐三水督餉其中爲接應大掃除而就近勦則
兩道分駐而亦可辦耀州爲受盜之衝守道駐耀
以逐其去三水爲納盜之衝巡道駐邠以要其歸
總之東防勦於劉家店西防勦於寧州中立防於
真寧此地形之不可易者也兵太分則士兵客兵
之相軋固不宜角立兵太合則東衝西衝之分據

亦不便歸併兵少則將不給兵多則將驕而餉亦
不易給倘兵委之將將委之敵而無監軍之司道
則制將難無轉餉之府廳則兵飫飽難濫殺可虞
橫斂誰馭而山深道曠卽給行糧又於何處辦食
耶則軋餼酒漿之具卽他爲取辦亦弗得太輻大
略勦加於邊盜而撫加於內地之脅從勦行而後
可撫盜定而後可防以久安耳必有全籌惠我西
土

回 兩憲諮詢利弊議 林逢泰

看得軍興以來兵苦于行間民困于輓運亦已極

三水縣志

卷之四

三十二

矣本縣與賊爲隣擾攘乞無寧日又溝崖登險車
路不通輓運尤其艱難竊意生財之源在於足民
而後軍需可繼輓運之法在於轉輸而後民力不
疲如緩征以紓民困改折以便徵輸此本縣今日
民生所懸望者至於兵貴神速早奏蕩平自不致
有匱乏之虞籌兵尤宜核兵籌餉尤宜核餉酌盈
濟虛因時量用

憲臺自有碩畫非卑職所能參末議也

回詢鹽法利弊議

查得本縣山僻小邑崖峻溝險車載不通從來鹽

商不至止有本縣之民招定小販合奏資本運鹽
銷引而土瘠民貧人無貿易商旅跡稀因以資本
難於措辦運鹽亦難於食銷此乃地不利而民無
可資生也每年額引六百張雖勉力完銷實甚苦
累今倘於額引之中酌減一二則鹽易銷而無壅
矣至於緝私販以疏官鹽嚴比較以稽勤惰法最
善也但本縣地既窮僻路又迂迴私販無大利市
是以大夥絕少即有一二販升斗之徒若此季拏
獲宥罪下季必相戒不敢復來乃兵快懼以無功
比較不得不捏報以倖免責罰季季皆然又不得

三水縣志

卷之四

三十三

不舍私販以幫賠贖此乃法愈嚴而弊愈滋也
雖奉有則報有無則報無之示又多蹈狗庇之愆
以此一縣民快憚於巡鹽比較而逃竄者十之三
四招募無復肯應今倘於比較功次之中寬免一
二則法可通行而無弊矣此皆本縣地方情形既
蒙下詢不敢不據實上陳其應否可行統在

上裁

詳

請設防禦

林逢泰

三水縣知縣

看得本縣山陬僻邑土蕪人稀城內居民不過百餘家不足當一城之守防兵寥寥十餘人僅可供撥塘之役其空虛實甚况土橋底廟等處皆屬要地而最險要者莫如東南石門關一帶深山峻崖乃耀州淳化宜君同官交錯之地奸宄出沒無常昔年設有巡檢司今廢近擬鄉民稟聞深山之中時有賊衆數十乘夜來往及召集鄉勇巡緝則潛遁不知去向似此情形誠恐釀成巨測貽害不小

三水縣志

卷之四

三十四

雖不在本縣地方盤踞竊發但震隣之恐應作未雨之防今查邠州營分防本縣城守及土橋二處兵丁不滿三十餘人汎廣兵單深不足恃愚見謂石門關一帶宜添設防兵以資捍禦則接壤州邑皆可無虞合請俯念封疆從長酌議庶地方有攸賴矣

再請防禦

竊照本縣石門關一帶乃耀州淳化宜君同官交錯之地奸宄出沒無常宜添設防兵情由已具詳本部院 蒙批據詳已悉矣此緞在案近聞淳化

縣有土賊劫奪布客之事深切震隣之恐復聞有
賊從北來經過石門關南去等情卑職隨即召集
鄉勇同防兵赴逐并馳會邠州營王守備親領兵
入山追捕賊已無踪仍嚴飭各鎮堡防備固守外
伏思本縣土蕪人稀汎廣兵單石門關以外皆隣
封汎界深山崖谷之中奸宄易於潛匿雖幸本地
方未有失事而賊情不測誠恐滋蔓難圖方今多
事之時傳聞不一人心惶惑不可不早爲綢繆也
卑職思維在前 題請西鳳協一營者原爲西安
府屬各州縣而設也獨三水一縣向未蒙呈請其
三水縣志 卷之四 三十五

內造有本縣地方奉委于邠州營兼汎第邠營額
兵單少分布縣城土橋二處僅兵三十名見今淳
化北山土寇出沒劫掠而本縣接壤交界萬一奸
宄窺伺虛實一旦陡發兵微民稀何堪應急當即
馳移邠州營統兵援剿然遠難驟至未免掣襟露
肘合無比照西安二十三州縣增添防兵數十名
於石門關一帶安設駐防則賊夥無由潛踪接壤
州縣亦可安堵此誠今日急着應否可行伏乞速
賜裁奪并請飭延慶隣近州縣營弁協力防禦其
保無虞地方幸甚

三請防禦

竊照真寧賊寇猖狂於本月二十四日突犯本縣

城池

甲職

督率居民崩火炮擊敗賊衆解圍南去

已經塘報外茲者大兵臨縣賊已遠遁此皆仰藉

憲臺德威所致業經申報在案但慶陽變亂本縣

逼近賊境誠恐兵去賊來出沒無常以一駐防把

總兵不滿五十馬僅二匹勢難守禦相應預請酌

撥精兵數十名馬十餘匹於本縣險要處所如底

廟鎮一帶乃真寧交界地方駐札防守則奸究自

當屏跡且城鎮有備亦可無煩調遣之勞此今日

三水縣志

卷之四

三十六

地方急着不得不亟請 憲裁者也

甲職

從封疆

起見不揣冒陳伏祈鑒照

四請防禦

竊照本縣邑城空濶兵少民稀屢詳在案近因隣

寇劫掠往來兵馬入城駐札百姓皆移居連城東

西二堡查本縣倉庫原設在西堡係順治初年前

任知縣王儒申請建置沿至今日獲保無虞細思

倉庫爲重守城不得不兼守堡

甲職

晝則入城辦

事夜則入堡守宿勞瘁所不敢辭但真寧爲不共

之仇迫在密邇而防兵寥寥無幾前蒙 憲牌云

檄行固原鎮議撥官兵防禦竟未見至而邠營
參將又仍回邠矣竊思邠州既有固鎮重兵彈壓
則邠營兵馬移駐本縣亦計之得者若必俟賊來
攻圍然後請兵不但兵未至而民已受荼毒及賊
去兵來而兵亦疲奔走况賊寇俱從石門關七里
川來徃則本縣一邑乃耀淳涇原之唇齒似不可
不從長計議也抑更有請者慶陽一路通於平鞏
今大兵往涇尙未進克平涼似可先分餘力以靖
慶寧上絕平鞏之狡謀下固西安之門戶又不獨
出本縣於湯火已也此在

三水縣志

卷之四

三十七

憲臺必有碩畫非卑職所敢置喙但卑職身處危
疆懸望日切故不揣謬陳伏祈鑒照

五請防禦

看得慶寧變亂以來本縣屢遭荼毒且流入內地
耀淳涇原皆受其害今又盤踞山中出沒搶掠猖
獗日甚此蓋窺本縣防守單弱乃敢深入橫行無
忌也本縣雖凋殘小邑實乃西安咽喉今大兵進
勦未卜何期而邠耀二州既有重兵彈壓獨真寧
一路通賊徃來寧州前報恢復今仍爲賊踞而寧
州至本縣僅一百四五十里賊已滋蔓似非昔比

豈一把總五十名兵所足抵禦哉即邠州營雖係分汛而兵制有限不無顧此失彼爲今之計倘再恢寧州設重兵以守之上也次則本縣扼要之地宜增設防兵以固門戶此萬不可緩者與其賊至調兵而分勦煩擾孰若屯兵要地而覬覦潛消否則恐賊勢日熾民生日蹙軍需將無所出勢必至於民皆爲盜矣卑職從封疆起見不識忌諱屢經申詳在案今據合邑士民公請謬陳一得之愚伏祈俯鑒民情詳察地形速賜裁奪地方幸甚

請禁兵馬入城

三水縣志

卷之四

三十八

看得兵馬不許進城先經奉

旨通飭在案近因征勦賊寇入城駐營山僻小邑從未經見不免驚惶慮恐日後兵馬來徃習爲成例小民不得安生所以有此哀控也本縣邑小民貧而城內居民竭力守禦皆係良善似當稍加軫恤合請恩鑒明示申飭嗣後如有兵馬止往關廂遵照前

旨不許進城則小民獲有寧居地方幸甚

請免鄉勇丁徭及改運糧草

竊照平慶變亂以來真寧逆寇出沒無常本縣受

害已極駐防兵馬既有單薄之慮欲再請兵又不能朝發夕至而兵來賊遁徒滋煩擾爲今之計莫若訓練鄉勇平居守望相助有急則合力撲剿庶稍有濟查本縣鄉兵已經時加訓練惟是百姓各有身家糧徭既責其遠運糧草又欲使之分身以急公事勢所甚難合無申請俯准應募鄉兵除地糧應納外暫免本身丁徭俟事平之日照舊徵追在

朝廷所豁無幾而凡茲鄉勇蒙軫恤之恩自無不鼓勵恩奮矣又本縣土瘠民貧去歲禾麥失收糊口

三水縣志

卷之四

無資近供應各項軍需愈疲奔命監門之繪有所難盡見今運涇糧草竭蹶陸續輓輸然途遠力艱兼賊寇密迥既乏裹糧之儲復懷內顧之憂不無觀望稽延祈恩准近運邠州彼處有車路可通且見駐固原鎮邠州營兵馬可以支銷如此則兵困漸蘇供運必多憲諭所云殘黎稍有起色需供辦無悞卑職或可藉以無曠厥職也再查本縣底廟一鎮爲咽喉之所界連真寧賊寇猖獗兵民俱不敢來往雖卑職數年來極力訓養百姓皆知忠義不甘從賊然賊勢滋蔓兵不一至保無有

勢孤情危使供賦之地反爲賊藪者乎應請
憲飭駐防兵馬時常到彼查巡庶百姓知我兵在
鷹揚之威愈加奮勇而逆賊聞風亦必斂跡矣至
真寧賊寇雖多但皆烏合之衆前繳備二副將領
兵到縣請以一紙書詰問真寧縣賊皆抱頭鼠竄
倘得一支勁旅直搗巢穴蕩平亦可立致此在
憲臺廟筭屬邑均有厚望焉

請免荒糧

看得荒糧包賠之累疊經備詳在案復蒙駁查見
憲臺以事關 國課深加慎重至意 卑職 何敢復

三水縣志

卷之四

四十

爲置喙但思民爲邦本賦由地出若地旣荒賦將
安出民旣逃亡 國課亦將何賴乎 卑職 身在地

方目擊旣真不得不呼籲 高明之前者本縣土
瘠民貧自古已然因明季節年增派所以原額賦
重其從前苦累載在通誌減糧議中已蒙

朝廷殷鑒蠲除無容復贅矣茲惟順治拾叁年因捏
報墾荒派在見糧賠納百姓逃亡甚衆遂併熟地
成荒幸康熙捌年秦屬蠲免案內豁除民困稍甦
但所蠲免者乃捏墾之虛數而熟地成荒之實數
尙未豁也彼時前官以奉文查捏墾包賠故止將

原報捏墾數目造冊詳報而因包賠逃亡熟地成
荒情由未及詳請槩免致有今日之累非既奉蠲
免之後逾時未久復有荒糧如許之多也今經五
年多方招徠逃者仍未復業細詢其故有逃竄日
久死亡無踪者亦有思其地荒糧懸一歸而連糧
爲累者因而裹足不前致使見在之民賠納困苦
勢必轉徙堪虞竊恐逃者未回而見在者復逃荒
者未墾而熟者復荒官民受累將何底止至於河
崩地畝因連歲淋雨暴漲前詳亦已報明况本縣
山高川狹一經崩吹徹爲石田非如河道平衍

三水縣志

卷之四

四十一

崩西灘可比若給以老荒之地則一墾榛莽又豈
焚芟孑遺所能施五丁之手哉伏見

朝廷蠲租賜賑覃恩屢頒卽如隣近空州一州荒糧
萬餘前蒙 督撫兩憲具疏奉

特旨蠲豁此子惠元元之德意普天同戴懇祈憫念
殘黎俯賜轉詳 題豁使見在者安心樂業逃者
必聞風思歸招徠勸墾不過數年內而原額可復
所謂有土此有土有土此有財有財是也

請撥例暫寬考成

切照本縣邑殘民困叠遭寇掠錢糧催呼不前不

得已據情詳請援例展限仰祈垂鑒茲蒙檄查見
上臺天地爲心誠下邑更甦之日也本縣地本瘠
薄民無貿易惟以農務爲生去歲春苦潦夏苦旱
秋苦早霜麥穀委屬不登百姓顛連無告至有食
穀皮以克饑典子女以糊口者又軍需緊急運寶
運漢運興運省以及運邠運涇率貸數金而僱一
役費倍蓰而致一石且運漢運興中途遭變米豆
付之烏有種種艱苦不惟疲於奔命實已竭其脂
膏况自去冬土寇竊發慶寧變亂本縣密邇賊境
出沒擾攘劫掠之慘迄今無有寧日屢經塘報在

三水縣志

卷之四

四十二

案亦屢蒙調發官兵征勦在案非敢有捏飾也既
值此慘禍民不聊生雞犬無存驚鴻莫定遠者穴
處巢居呼之不敢出近者鳩形鵠面刑之不忍加
猶幸民知大義不肆從賊涇州糧豆陸續輓輸在
新餉既苦竭力則舊餉益難併征是以拾叁年未
完錢糧催呼不前職此故也本縣以彈丸之邑當
慶陽全郡之賊防兵不滿五十捕員亦且乏人

職一手拮据勞瘁備嘗豈不知考成爲重功各可
念第處此時勢實無可如何耳况卑職一人之功
名不足惜竊恐有礙

各憲臺考成究竟無益於國課而且有害於民生甲職所以不避斧鉞據實詳請者也伏祈俯鑒轉達察例題請寬限官民幸甚

請停緩續派糧草

查得十四年續派糧草先奉文撥運邠州旋改運涇州正在督催間忽遭逆賊入城之慘民心惶惶不免觀望嗣而賊勢鳴張攻剋堡寨燒殘麥穀民益風鶴靡寧然甲職多方撫諭百姓陸續輓輸今又改運平涼極力催督前後其完米豆壹千叁百餘石惟草束一項委難輓運已據里民哀控備叙

三水縣志

卷之四

四三

情由申請蒙憲批布政司查議通報在案昨又同周司獄審供申報在案甲職非不知軍需為重

祇緣本縣迫近賊巢出沒不常迄今一載無有寧

日方追呼稍有頭緒忽聞警遂即逃散小民自顧身家不暇安望輸將恐後乎此催運之難一也本

縣名有八里而東北之椒村職田北宮三里與真寧接壤南之蒲村一里與石門關毗連皆慘遭寇

掠逃亡過半僅存四里亦無全戶全戶舊有四鎮集市今底廟職田土橋三鎮皆已荒廢民生日蹙

賦稅無出寬之則追徵不前急之則愈思逃竄此

催運之難二也本縣設在萬山之中四面溝崖崎
嶇自古無車輛可通肩挑背負所運幾何而平涼
往返千餘里動需半月則此一月之內能得幾運
乎此催運之難三也有此三難復有新舊本折車
折夫驢省倉郿縣各處解運之繁勢難兼顧力難
分應所以不能依限速完者屈於時勢無可如何
耳查各省用兵地方皆有停征緩征之例即秦省
被賊州縣亦有徼息豁免者本縣與賊爲隣同一
殘破而民知大義始終不肯從賊獨不可格外加
恩一視同仁乎伏祈憫念殘黎輓運之苦下吏督
三水縣志 卷之四 四十四

催之艱俯賜鑒宥殘邑幸甚

請改徵草束及免車輛

看得本縣邑殘民困至今極矣久在照臨之中無
待贅責但賊寇之擾攘晝夜不寧軍需之輓運南
北奔馳何敢言瘁所最苦者惟運平涼草束一項
蓋本縣僻處山陬溝崖崎嶇自古不通車路並無
車輛若一驢所馱多至七八束而往及十餘日止
足供一驢之食何以交納一夫所擔僅可四五束
而一夫之盤費工價不啻數倍民何能堪所以米
豆能運而草束不能運者此也至於派運涇州車

輜尤爲苦累本縣旣已無車令往邠長等處僱覓而邠長亦在用車之時僱覓難得若云折驢計用驢七百九十頭不惟驢畜屢遭寇掠而喂驢之工料費更不貲若云折夫計用夫一千五百八十名不惟民多逃亡卽見在之民各有應納糧草運平涼運省倉運郿縣並無空閒之身可以應役况近慶陽復叛真寧賊寇又肆鴟張不當留此百姓爲守禦計乎值賊寇破殘之後民窮財盡正賦催納不前又何堪此額外之供八里小民等所以嘵嘵顛控也

卑職

非不知軍需爲重但目擊地方一限

三水縣志

卷之四

四十五

於地勢之不得行一限於民力之不能堪不敢不據實上達伏祈憫念殘邑與各屬不同請醫草東一項仍舊徵銀起解與其虛懸不可得之數以疲民孰若稍一變通而民困可甦正賦無缺乎其選涇州車輛除已押解民夫赴涇運糧外請祈憲恩特爲豁免倘萬不獲已則如平涼府所申僱車一輛價二兩二錢此項委無額銀保充等語本縣照依價數備銀解送平涼府自行僱覓斯亦全之策也伏祈俯鑒裁奪施行

再請改徵草束及免車輛

竊照撥運平涼一項

甲職

極力督催寢食靡寧

百姓經殘破之後疲困已極茲復隣寇告警風鶴

尤甚

甲職

不避艱險躬詣各鄉勸諭督催據各里

民哀訴時值隆冬歲暮凍餒難行且運解米豆驢

夫被賊搶掠尚有未回父哭其子妻哭其天慘目

傷心難施之以法矣其草束萬難輓運前後屢經

詳請在案在上臺以軍需爲重未暇詳察地方

情形未荷俞允然向蒙 吳藩憲身臨其地昨又

蒙委周司獄目覩其形

甲職

豈敢有一字虛飾乎

地勢旣不得行民力旣不能堪

甲職

力難排山術

三水縣志

卷之四

四六

乏點金將何計可施乎况運過米豆雖抵正賦無

幾而民間已費數倍矣至於派車七十九輛因山

溝崎嶇自古不通車路業已折夫若干名驢若干

頭押解涇州輓運交平涼訖有被賊擄掠蒙平涼

府憫念發回者尙有未回者小民間風畏避中途

遲延此又豈一二解役所能禁乎更有請者按糧

均派固出至公但本縣荒糧甚多見今椒村職田

二里逼近賊巢里甲皆已逃散餘里亦逃亡多半

實難與各屬同論即如咸陽派車五十四輛永壽

派車四十五輛而本縣派車七十九輛今試取一

水與咸陽並較人皆知其弗若也而派車且過之
况既不通車輛折夫折驢數目過多民力有限其
何能堪此耶竊恐民生日蹙逃亡日甚將來軍需
更不可問矣在卑職勢處萬難罪無所遁而百姓
情實可矜伏懇俯加軫恤原情寬宥官民幸甚
請改徵折色

竊照本縣荒僻小邑百姓夙稱貧窮而此時尤甚
錢糧舊有逋欠而近歲始多緣地方逼近賊巢登
遭蹂躪十室九空而各處輓運本色役繁費多不
堪奔命是以民愈困而賦愈缺爲今日計有可以

三水縣志

卷之四

四七

恤民力并以濟軍需者不得不切實具陳也本縣
設立山中溝深徑險車輛不通其草束萬難輸運
情形屢據民詞申請改折蒙 憲批查議見候批
示在案至派運米豆雖見在勒輸飛挽但道途險
遠無車可運背負不過二斗驢馱不過四斗所運
幾何且往返動需時日曩糧有費喂養有費賠累
不貲每役數人而致一石之糧費數金而完一石
之額殘黎何能堪此乎况新舊併征十三年運省
倉節縣長武十四年運省倉涇州平涼十五年又
運平涼倉倉計三年共派運米豆一萬八千三

百五十餘石額數既多奔走又繁就人而計之本縣行差丁四千一百八十一口將必併差二十年之丁而後可以足役就銀而計之本縣起運額徵一萬一千七百餘兩將必併丁數年之賦而後可以足額百姓前此之輓運者無論矣即如今歲兩月有餘共完米豆六百餘石民之供役不下三千餘人民之實用不啻三千餘金而算抵正賦僅六百餘兩由是以推民無休息之期賦無完納之日勢必民生愈蹙國課何賴上下交困終非計之得者况隣氛日熾百姓風鶴靡寧此尤可矜可

三水縣志

卷之四

四十八

念者也

甲職

目擊時勢孔艱再四思維止有將派

運糧草俱改徵折色庶民困可以稍甦正賦不至終缺與其虛懸難完之數以爲民困孰若議一變通之計以圖有濟耶

甲職

從國賦民生起見不

揣據實切陳伏祈軫念殘破僻邑實與各屬不同特賜恩卹俯從所請百姓幸甚下吏幸甚

請賜寬免

查得本縣土瘠民貧夙稱上疲不幸復迫近賊境屢被擾攘人畜槩遭荼毒地荒丁逃不得耕種者十有七八兼各處輓運糧草役繁費多皮骨僅存

民窮財盡未有若此時之甚者 早職 屢將被賊蹂躪情形塘報在案并將殘黎各年錢糧難完情由詳請蠲恤在案業蒙 憲恩查明十四年未完錢糧 題請蠲緩是民間困苦已在洞鑿中今幸撫遠大將軍疏請寬免奉有 部行此正 憲臺加恩軫恤殘黎仰望更生之日也所有各年未完本折起存錢糧并被陷百姓地畝理合據實造冊齎報伏祈憫念邑處民困慨賜全蠲庶才遺者思安故土逃竄者聞風復業於以維民命而培國脈非淺鮮矣

三水縣志

卷之四

四九

請免房稅

看得本縣夙稱荒僻小邑民皆穴居野處家在城郭者寥寥 早職 履任之後脩葺城垣招來人民疏通行旅城中烟火稍有可望然亦不過涸鱸爲生非有經商舖肆可比不意隣寇侵犯城郭民家既遭拆毀加以兵馬往來重爲踐踏百姓盡行遠徙借居村堡數載經營悉化榛蕪矣今所存壹貳三屋見住防兵及過往兵馬宿歇之所已無人民居住若責以徵稅不惟房主無人承應且恐招徠畏避不前耳又本縣設立山隅從無水陸馬頭正

有四鎮每遇集市之期席地爲肆日中貿易並無
店舍况寧寇竊發以來底廟職田土橋三鎮或近
賊巢或毗山數皆經焚劫久成丘墟而張洪一鎮
名雖僅存舊無衛宇均難徵輸宜乎小民賈宜等
之合詞具控也伏閱 部行有隣近賊寇城池鎮
店如有不便徵收聽 督撫詳查具題等語本縣
既接賊境又經殘破正與 部例相符請祈俯念
民艱援例豁免百姓幸甚 卑職 目擊凋殘苦况不
得不據實上達伏望垂鑒

請免天驢

水縣志

卷之四

五十

案查先奉文派雲棧驢八十頭又奉文派黑水峪
驢三百四十八頭今又奉派舊縣關驢二百七十
七頭三次共派驢七百五頭每頭折夫二名共折
夫一千四百十名在軍興時急公之誼亦何敢辭
但本縣經賊寇破殘之餘瘡痍未起逃亡未復實
難與他邑同論者蓋非獨驢夫之難而盤費腳價
之尤難也本縣越溝踰險百倍艱辛每夫一名議
價二兩五錢驢倍之計用夫一千四百十名該腳
價三千五百二十五兩以荒殘之邑歷年錢糧多
方敵比尚不能完乃一旦令出數千金之費其能

之乎雖云夫驢按糧均派但本縣地荒糧懸見在
之民賠累獨苦今所派不惟倍永壽長武淳化之
半且倍咸陽三分之一以三水視咸陽其堪比擬
乎卑職知軍需爲重極力催督將雲棧驢八十頭
折夫一百六十名已經押解運糧訖黑水峪驢夫
合筭其棧驢一百五十三頭亦已押解起行訖其
未完及驛縣關之驢見在催解而合邑士民咸稱
力萬難支哀號之聲不忍聽聞竊思本縣屢遭寇
掠民逃地荒見在招徠未集若再加困苦勢必轉
徙愈多民力旣竭必致軍需愈悞况一夫背米二
三水縣志

卷之四

五十一

京斗折市斗止一斗四升約計費二十金而運一
石之糧民財更爲可惜派數似可酌減卑職忝居
民牧日擊情形不敢不據實上達伏祈

憲慈憫念殘邑格外施恩俯賜寬豁存此子遺之
民生功不在開疆拓土下也

請豁逃丁

竊照三水蕞爾小邑僻處山谷之中屢經兵燹之
餘土瘠以荒民稀而貧前在秦屬蠲免案內本縣
所豁丁糧較他縣獨少且地方與慶陽接壤邇年
隣寇猖獗肆行荼毒民不聊生相率逃亡者不可

勝計而其存者又皆伶仃孤苦鳩形鵠面有鄭俠
之圖所不堪繪者矣茲奉檄編審甲職稟遵

功令矢公矢慎確見本縣八里里無全甲甲無全

戶民生疾苦慘目傷心然死者不可復生逃者尚

可復回乃多方撫諭竟未復業細詢其故皆因歷

年積逋負累已深又見輓運本色派撥夫驢疲困

難支所以徘徊却步恐作他鄉之鬼耳前奉

督憲批據小民李三陽等所告丁逃地荒事轉行

到縣甲職確查死逃丁八百七十五丁冊報已蒙

憲慈彙入請賜寬免案內詳請 題豁在案今當

三水縣志 卷之四 五十二

審編之時應否即准其開除此格外之恩出自

憲裁非甲職所敢擅便也合請明示以便造冊詳

報

請免地稅

查本縣原係山僻小邑先定有地稅三十兩歷年

賠累不堪蒙 總督鄂有地稅不宜定額之請民

慶更生今又累遭賊寇見在地稅分毫莫納何能

完二百兩之額是徒以苦累民生而究不得增餉

實用委難定額徵銀詳報在案今奉駁查再查看

得本縣荒殘已極歷年正賦敲比莫完幸蒙

憲恩於請賜寬免案內開豁若此虛懸地稅更甚
徵輸無着况地有肥磽物有不齊秦省非江南可
比三水又非秦中州縣可比何能照例同日而語
也甲職非不知軍需爲急但目擊民生困苦不敢
輕議伏祈俯鑒轉達寬宥

請寬鹽功比較

看得本縣山陬僻邑壤接延慶徃例捉獲功次原
因花馬池路通小鹽私販自北而南今平慶俱經
變亂已逾年餘大兵見駐平涼北道間隔商旅不
行且本縣不幸與賊爲隣疊遭蹂躪地方荒殘已

三水縣志

卷之四

五十二

極食鹽之家逃亡過半集鎮盡成丘墟徃來視爲
畏途又安有私販之人可以捉獲圖功耶况衙役
寥寥數人因軍需緊急各處催運糧草押解夫驢
奔馳靡寧難以分身解比伏祈垂鑒暫寬功次此
較候事平之日仍舊報功解比此出於時勢維艱
不得不上達以邀 憲恩者也

請改徵折色

查得本縣拾伍年分兵餉銀壹千肆百壹拾餘兩
零已經徵解通完訖惟本色糧草壹項因本縣山
溝深險車載不通驢馱背負所運無幾而徃返動

需時日奔走靡有休息費數倍而算抵正賦十不
得一又奉派各處運糧夫驢柴百餘頭約費數千
金財竭力疲至今而極况自拾伍年柒月以前疊
被賊寇搶掠民逃未復今因輓運困累逃者日衆
而見在者奔馳於秦州鳳翔商州舊縣關各處之
役甲職雖極力督催苦於無民可比所以不能依
限通完者職此故也甲職將糧草難運情由詳
請改折既蒙司詳 憲批如詳竟未蒙允行在民
窮於運納在官亦窮於徵追惟有束手待斃而已
見今考成在即不獨上下有碍而

三水縣志

卷之四

續五十三

國課亦無所濟伏乞

憲臺俯念殘邑實與各屬不同恩往改徵折色庶
百姓便於完納正賦不至終缺矣

請免續派夫驢粟米

看得三水痼疾之邑又經寇殘之餘民逃地荒因
苦大不堪言屢經詳請在案業蒙

憲臺將節年逋欠錢糧具 題蠲緩而本色難運

准改折徵是三水之百姓叨沾 洪恩已深且厚

而百姓之苦情荷蒙 慈鑒亦已詳且周也甲職

正在撫慰殘黎宜以

憲臺德意招徠逃亡勸輸稅賦不期軍興旁午派
運浩繁其從前之輓輸勿論矣卽近今奉派商州
驢壹百拾捌頭續派驢壹百頭三派驢壹百壹頭
舊縣關驢壹百伍拾貳頭續派驢壹百壹拾叁頭
三派驢壹百伍拾貳頭鳳翔驢伍百玖拾頭續派
驢伍百伍拾頭秦州驢貳百捌拾頭續派驢伍百
玖拾柒頭山陽驢肆拾頭共計貳千柒百玖拾叁
頭本縣無車若壹驢折貳夫筭當用伍千伍百餘
夫矣以本縣額徵糧壹萬壹千餘兩計之腳價之
費浮於糧額以行差丁肆千壹百捌拾壹丁計之

三水縣志

卷之四

續二

力役之人踰於丁額似此殘邑子遺之民而能堪
之乎卑職每一捧檄惶怖不知何以報稱輒思本

縣百姓困苦久在 洞鑿必蒙軫恤無待贅陳又

思軍需急緊民瘼或無暇及因而不敢詳請一面

勸諭催運晝夜靡遑今幸完將及半實收亦陸續

齎報矣無奈百姓之血力已竭驅策不前而逃亡

日衆况本縣前因本色難運詳請改折今仍派運

秦米柒百柒拾餘石程途愈遠背負愈艱徃反動

需月日終無完運之期甚至百姓因此苦累多藉

口遠運而徙倚他鄉逃避不歸者不惟軍需輒道

無人而額徵兵餉亦因之輸納缺悞矣伏讀
憲檄以秦鞏荒殘曲加恩恤則本縣地方亦經寇
殘而百姓不甘從賊獨不可作同仁之視乎卑職
目擊情形深思後患有不忍不言之情亦有不得
不言之勢不揣據詞竇請伏乞

憲臺憫念殘邑與他邑不同將續派各案夫驢粟
米俯賜蠲免使得悉力料理初派未完各案勒比
實收則軍需民生兩可無悞其以奠安邦本非淺
鮮矣

以上諸詳俱蒙
憲臺垂鑒如給示飭禁兵馬入城十四十五年糧

三水縣志

卷之四

續三

草准改徵折色又十四年未完錢糧具
題蠲四緩六派運夫驢等項減十分之二此皆仰

荷
憲恩以恤殘黎謹識之傳茲奕世

詩

古者諸侯卿大夫會盟鄰國微言相感當揖讓之時必稱詩以喻其志蓋以別賢不肖而觀盛衰焉孔子刪詩三百五篇以垂勸戒以正人心此詩之所由始降而漢高大風歌以及魏建安晉太康之末其體三變五言起於蘇武李陵六言起於谷永七言起於漢武帝使群臣為栢梁詩而其源皆肇於三百也幽國僻處北陬各流鮮至故唐宋以來作者寥寥其登大雅之壇者獨有二三君子所咏誠夜光之圃王樹之林與

五言古

北征

唐杜甫 襄陽人 工部員外

皇帝二載秋閏八月初吉杜子將北征蒼茫問家室
維時遭艱虞朝野少暇日顧暫息私被詔許歸蓬蓽

三水縣志

卷之四

五十四

拜辭詣闕下怵惕久未出雖乏諫爭姿恐君有遺失
君誠中興主經緯固密勿 反未已臣甫憤所切

揮涕戀行在道途猶恍惚乾坤含蒼瘴憂虞何時畢

靡靡踰阡陌人煙眇蕭瑟所遇多被傷呻吟更流血

回首鳳翔縣旌旗晚明滅前登寒山重屢得飲馬窟

邠郊入地底涇水中蕩潏猛虎立我前蒼崖吼時裂

菊垂今秋花石戴古車轍青雲動高興幽事亦可悅

山果多瑣細羅生雜橡栗或紅如丹砂或黑如點漆

雨露之所濡甘苦齊結實緬思桃源內益嘆身世拙

坡陀望鄜時谷巖互出没我行已水濱我僕猶木末

鷓鴣鳴黃桑野鼠拱亂穴夜深經戰場寒月照白骨
潼關百萬師往者散何李遂令半秦民殘害爲異物
况我墮氛塵及歸盡華髮經年至茅屋妻子衣百結
慟哭松聲迴悲泉其幽咽平生所驕兒顏色白勝雪
見耶背面啼垢膩脚不韞牀前兩小女補綻纒過膝
海圖坼波濤舊綉移曲折天吳及紫鳳顛倒在短褐
老夫情懷惡嘔泄臥數日郵無囊中帛救汝寒凜慄
粉黛亦解包裹裯稍羅列瘦妻面復光癡女頭自櫛
學母無不爲曉粧隨手抹移時施朱鉛狼籍畫眉闌
生還對童稚似欲忘饑渴問事競挽鬚誰能卽噉喝

三水縣志

卷之四

五十五

翻思在賊愁其受雜亂聒新歸且慰意生理焉得說
至尊尙蒙塵幾日休練卒仰看天色改旁覺妖氛豁
陰風西北來慘澹隨回紇其王願助順其俗喜馳突
送兵五千人驅馬一萬匹此輩少爲貴四方服勇決
所用皆鷹騰破敵過箭疾聖心頗虛佇時議氣欲奪
伊洛指掌收西京不足拔官軍請深入蓄銳伺俱發
此舉開青徐旋瞻略恒碣昊天積霜露正氣有肅殺
憶昨狼狽初事與古先別姦臣就菹醢同惡隨蕩折
不聞夏殷衰中自誅褒姒周漢獲再興宣光果明哲
桓桓陳將軍仗鉞奮忠烈微爾人盡非于今國猶活

淒涼大同殿寂寞白獸闈都人望翠華佳氣向金闕
園陵固有神埽洒數不闕煌煌太宗業樹立甚宏達

幽騷四首

明文翔鳳

邑人

遠山青於天近山青如眼好眼爲誰青山遮眼光短
山外是天涯山色不可剪苞裹蓮心中千瓣交深淺
自我念遠人衣帶日三緩嗷嗷南雁翔不愁銜尺簡
隙駒白幾何呻息歌棗纂迅電縮鈺窠好跨百花輦
昔我觀流水頗亦寓遠情行行出左谷委蛇本通涇
通涇不通渭渭水正奔橫渺彼秦漢畢更阻長都城
飛堞冠天杪縹緲九霞生青門連朱戶赤縣界崢嶸
三水縣志

卷之四

五十六

鹿臺交二水雙鯉下游并

人耽夏日長我乃愁相裹非我乏風襟塵勞良亦夥
日道又南征風箕正揚簸撫此虛堂靚百煎重磊研
因感元亮貧松菊尚倚儺何處通三涇詞辨空炙輶
脫粟上盤餐痴腹猶堪果糲貸遠難期是兒最信區
曠代擬其才高唵或自歌內觀燦心花菡萏青一翠
鴉鳴尙求晨迎白入林杪曠此遠人期寤言良擗標
狼籍新雲殘破碎繁星小好音不可裏我心頻祇攪
安得垂空牋立付蓮花爪反覆折肝腸其情向誰討
長畫控風蹄川原跡如掃如以斷腸花易我忘憂草

褰裳往就艱坐謝餘顏老

春行石門山中

孤巒峙萬高蒼烟橫群壑其下水鬚寒垂垂尙戍削
空說山光宜不道春色薄雖則春涼薄人情未全惡
昔予此駐馬錫名以捫天青遠開秦甸紫來控漢關
攀條入七里抉竇出九灣陟巘復降沚赤墳來正殘
再興自白陂厲風摧折之呼僮射風伯冉冉至夾池
五臺與巖辭崢嶸向兩眉乃知甘泉宮只在石嶺西

五言律

石門道中

明秦

渠邑尹

三水縣志

卷之四

五十七

聞道石門險特來險處遊兩山夾崖合一水吼關流
日擁長安近雲連紫塞浮君門應萬里回首不勝愁

萬壽湫

明文翔鳳

一夜豐隆肇神工隱斧痕龍蟠仍此窟魚服想如銀
謫蒲湏朝帝濤來卽躍門他時憐故井偏贈雨翻盆

紀遊

漫造翠屏陰穠桃逼澗森稍泉斜瀉玉雞阜上捫參
與壤京丘野籥章雅頌音定知嗣作者前達其披襟

聞雁登王案樓

聞鴈夜登樓山空水送秋漸磐吟王案排字韻霜寒

月聯行淺齊雲數點流隱人於此際不免和詩猴

再經悟空寺

明文毓鳳 邑人 武城令

當年三笑處此日又重登碑落蠹為字堂虛鶴是僧
有泉堪振錫無得問傳燈擘擘青蓮色支公見未曾

遊稍泉

文濤 邑人

幽徑蒼無際捫蘿到水頭看山僧共坐賡句鳥相酬
雲落空潭影蟬鳴古樹秋登高聊一望暮雨鎖煙樓

長至日泮宮告成集諸生瞻拜 有林逢泰 邑尹

余承乏幽土見學宮傾圮愀然久之竊嘆世之事
佛者招提蘭若不惜金錢奔走如驚至學宮榛蕪

三水縣志

卷之四

五十八

漠然置之殊不可解或云佞佛與其獲福多靈應

也余笑答以聖人道大固不待論即如人讀其書

便能識字知義理不讀其書便不識字不知義理

此豈非至靈應者乎適王司訓至因令董其事與

諸生謀共脩葺先捐微貲為之倡一瓦一木不以

累及民也幽土瘠苦寒或屈於力或阻於時是以

遲之三年迺竣厥功然此心歷三年如一日其始

末載在文俶明先生記中告成之日值南至集諸

生瞻拜禮成而紀以詩伏念先君子倡道笱堤

特祀學宮雖關閩異地而淵源相接故末語偶及

之承諸紳士賡和酬韵若有會於旦氣之旨益以見道南一脉嚶鳴不孤云

人文千載蔚輪奐一朝新壁沼蒙泉動德星井埜陳飛葭融九谷立雪重吾閩南望筍堤石遙含泮藻春

和韻

王採延川人

仰止筍堤化遙聞如昨新傳心旦氣遠明德五經陳

筍堤夫子倡明旦氣註疏五經

堂構今成泮芹香頃若閩趨陪光俎

豆應報上林春

又

文倬天邑人

猗歟師水北思樂泮池新璧府圖書見璜宮俎豆陳

三水縣志

卷之四

五十九

陽生時法夏旦氣學宗閩曼碩維侯績瞻依在萬春

又

泮水光華麗橋門氣象新五星奎始聚六代樂方陳

文運原開漢聖功共頌閩彼都于邁日葭管正飛春

又

張侗邑人

幽陽鐘鼓地初日又從新瑞氣三階集卿雲六管陳

文章識後載家世見前閩吾道誠何幸西南一色春

又

張壯猷邑舉人

思樂何年事美哉此日新駿奔多士列長道我侯陳

夜氣全歸旦幽風竟似閩筍堤流澤遠不止慶陽春

又

第五淑熹 邑人

聖教復淳古鳩工堂構新道涵璧沼奧化被鼓鐘陳
開學於東魯傳經自建閩筍堤邁德早花蒲河陽春

又

第五淑愈 邑人

宮墻闢數仞俎豆復更新翠柏時寒操豐碑古徑陳
琴聲流采藻臯比景南閩問學溯源遠筍堤到處春

又

王相之 邑人

昔頌筍堤教今觀壁水新後先臯比應南北雅歌陳
旭日明初載德星燦八閩欣承於樂咏何以繼陽春

又

王光烈 邑人

三水縣志

卷之四

六

誰闢宮墻草忽驚此日新作人先藻采學禮愧詩陳
筍石來西極林風度七閩迎陽開且氣拍拍蒲襟春

又

許桂 邑人

載咲從公邁趨瞻廟貌新音昭鸞藻美禮教豆籩陳
且氣開幽谷芹香憶古閩正當快立雪何羨光庭春

又

張候 邑人

令節欣從始宮墻此日新衣冠環壁動桃李映階陳
繼述知先德淵源有後閩何須鄒子律芹藻咏長春

又

文龍軒 邑人

城闕闕宮古風香采藻新築堤疑筍繞 先是水不至
泮林今築堤

改繞其前
以禪風氣
濟壁聚星陳
文物依然曾淵源溯自閩嚴
寒吹律蚤幽谷盡生春

又

文龍標 邑人

廟貌千年舊鸞聲此日新
子言詩禮雅士樂鼓鐘陳
再變應過魯起衰好向閩
筍堤勤仰止立雪亦含春

又

馬三錫 邑人

鼓鐘鳴豫治物象一時新
奉壁羨墻近環橋古道陳
文風開北地學海重南閩
更喜日初永菁莪千載春

又

王翼 邑人

先進作人意淵源啟緒新
五雲迎藻采八代起文陳

三水縣志

卷之四

六十一

遠壁懷洙泗環橋憶筍閩
龍門欣得御瞻禮萬年春

又

林逢元 晉江人

淑氣來天地文觀向鼎新
茆芹留壁獻櫺檻啟星陳
海內源宗泗關中派接閩
律吹郁國黍香薦蒲宮春

又

林逢濟 晉江人

屏峰縈壁翠奕奕向陽新
風散絃聲迥水洄藻色陳
文光橫井斗且氣徹關閩
幾動望洋嘆書香拂座春

又

林繩謨 晉江人

閩闔文明煥重開
扞履新香芹花縣繞
芄撲泮林陳
奎聚垂雙澗雲書望七閩
擬將盈壁水分濯筍江春

又

文崇袞 邑人

翊聖傳心遠環橋式化新一朝輪始煥百代雅方陳
南至奎連井西來關續閩昭昭色笑日池草自生春

又

張爾猷 邑人

家世詩書舊作人廟貌新橫渠源水合堤筍德星陳
絃誦全宗魯羨墻宛見閩幽陽今復且鄒律正吹春

又

任望 邑人

衣冠踰濟日丹蘄一時新王曆吹陽至文光絢井陳
新槐迴北斗觀海羨南閩白雪誰為和長懷筍石春

又

第五鑾名 邑人

三水縣志

卷之四

六十二

其聽鐸聲遠譽髦槐市新一陽蒸且氣半壁繞勾陳
棠芾方歌召鸛脚却向閩坐風欣有脚瞻仰秋門春

又

王達可 邑人

王律陽和至璜宮且氣新趨踰盈壁水色笑映勾陳
文化如興蜀聖功更頌閩臨池華藻麗紅紫總同春

又

周崇雅 邑人

作人欣作廟壁沼煥然新小大從公邁圭璋髦士陳
天文迴北斗且氣接南閩大道無疆界藻芹處處春

七言古

幽歌行

唐李

白

彰明人翰林供奉

山谷稍稍振庭柯涇水浩浩揚湍波哀鴻酸嘶暮聲
急愁雲蒼慘寒氣多憶昨去家此爲客荷花初紅柳
條碧中宵出飲三百杯明朝歸揖二千石寧知流寓
變光輝 霜 颯繞客衣寒灰寂寞憑誰暖落葉飄
揚何處歸吾兄行樂窮曠旭滿堂有美顏如玉趙女
長歌入綵雲燕姬醉舞嬌紅燭狐裘獸炭酌流霞壯
士悲寧寧見嗟前榮後枯相翻覆何惜餘光及棣華
七言律

春過郇邑

唐鄭

谷

宜春人世號鄭鷓鴣

百里花封俗化淳名踪盛跡半猶存峪評白虎藏巖
三水縣志 卷之四 卒三
洞地湧金泉過石門舊縣城頽三水鎮故家樹老五
林村碑殘墮落夫人塚苔蘚年年長淚痕

又

一脈清流何所之縈莎漱蘚入僧池雲邊野客尋來
處石上寒猿日落時聚沫遶槎殘雪在迸流穿樹墜
花隨烟春雨晚閑吟後不復重遊黃鳥坻

石門卽事

明劉

州訓導

峻嶒石壁千山遶豁達雙門一逕開更有藤蘿淹日
月豈無龍虎出蒿萊空中樓閣供竒玩眼底風雲起
後才聞說扶蘇遺廟在年年烟雨爲誰哀

遊玉泉觀

玉泉觀裏柏森森培養靈根異鄧林甘露點珠多麗
澤暖風吹雨挹晴陰霜枝峻絕朝華老勁節孤高晚
翠深日見棟梁成大用掄材端擬重南金

暮春舟翠樓讌集

有引

林逢泰

正尹

予重脩邑城建南樓題曰舟翠蓋取公劉舟王之
義而翠屏山即所謂迺陟南岡是也抑先聖有言
君猶舟民猶水得夫舟之義夫亦愈思水矣辛亥
暮春告成集諸紳士落之文俶明先生賦詩志歎
適同人過此登覽和咏併錄以志風雅云

三水縣志

卷之四

六十四

拾攜春酒上層樓汎澗屏峰積翠收百室桑麻慙政
拙數聲蛙鼓對琴謀鶯花繚繞雲侵袖雉堞飛翔水
起洲蒲座薰風憑剪拂何須姑射羨城頭

和韵

文倬天

邑人

斷續煙光暮入樓山旒水帶望中收登高喜近郇侯
座作賦殊慙王粲謀雨脚遙垂芑黍隴雲衣半覆芾
棠洲花朝對飲懽無極疑在綺霞最上頭

又

張

倜

邑人

登高此日羨層樓極目幽風一望收青靄遙從碧澗
起翠峯直與白雲謀政清冠履趨前座日暖鶯花撲

遠洲嘉燕有加歡未已佇看婦影燦城頭

又

李日焜

晉江人
寧遠令

息馬登臨上翠樓溪光山色爛難收桑麻漸滿還幽
古雉堞高翔壯遠謀種秫無田慙五柳鳴琴多暇羨
瀛洲冰壺玉尺君家舊佇看尙書正黑頭

又

王鐘鳴

惠安人
莊浪令

彭令停驂上翠樓幽圖滿幅望中收溪邊桃柳屏山
色郭外桑麻良宰謀舟水相依通九谷鏡煙互映在
三洲舊時父老傳遺蹟爲指芾棠遍隴頭

公先任隴西
有鏡煙紀咏

三水縣志

卷之四

卒五

又

文龍軒

邑人

秋空縹緲庾公樓列代流風檻外收信識南薰能化
俗何勞西顧動深謀四郊靜吠安籬戶千里哀鴻集
遠洲從此幽風重續雅嘉名應上御屏頭

又

今夕何緣舟翠樓滿山秋色座中收神君城上騰姑
射賤子風前媿仲謀澤被二南寧百里盃深五斗節
十洲自從車馬函關度已識棠枝過隴頭

又

昔日幽亭此日樓遺風如昨尙堪收授表莫道千年

寧朋酒還因萬壽謀每每平田連翠巘蒼蒼秋水澹
葭洲丹青難繪仁君力四壁端尋頽虎頭

又

周崇雅 邑人

兵燹百年見此樓山城今始有冠旒窮簷夜靜無驚
犬瘠土春深不佩牛翹首風雲瞻北極憑欄稼穡眺
西疇文高添水真兼隱製錦心閒對白鷗

又

林逢元 晉江人

俯瞰縣花恍萼樓風隨南至拂絃收垂青柳意當樽
舞滴翠山容到檻謀聲落八窻飛碧澗光搗四座傲
滄洲榛苓造企西方美舟水何如昔隴頭

三水縣志

卷之四

平六

又

林國珩 晉江人

孤城猶喜有南樓眺覽煙光几席收不盡風雲生筆
興好將詩酒與山謀遠沙鷗白依寒渚隔岸峯青遶
翠洲遙憶故園丹荔熟輕薰移向河軒頭

丁巳春日登舟翠樓感懷用 林彙菴明府樓

字韵

楊紹武 富平人 永嘉令

偶來縱目一登樓萬古風光次第收接檻羣峯皆北
向環城諸派轉西流原田未改先農舊陶穴依然太
古儔最是比隣多負險連年鼓角動邊秋

又

振衣百尺眺危樓多難登臨恨未收川谷居然當險
側鋤犁遂可抵貔貅倉庚半雜哀鴻叫南畝惟增轉
粟愁撫字誰憐賢牧苦每教對酒皺眉頭

又

神功鬼斧此層樓雨過嵐光滴翠流汎水灣如朝縣
郭南岡勢欲顧磯頭依稀樹影窺懸岸縹緲人烟出
半溝惆悵幽風多古意須知當世有公劉

幽邑八景

有引

文倬天

邑人

暮春霑雨浹辰閒居岑寂檢讀王父鉅賦內有幽
邑八景有題而無詩殊為缺典且題有公劉故址

三水縣志

卷之四

六七

公帝新宮但故址在半川湮為丘墟新宮在邑內
鞠為茂草荒煙冷雨之中莫可探識今妄改以翠
屏新霽石闕舊關庶為都人士所共見曰者勉成
八詠以紀厥勝云

磯頭煙雨

紅泉湧處有潛蚪吸氣為雲帶雨浮夜積新濤鳴礮
底朝騰宿霧覆山頭陰膏夾潤來青壠澌脚飛涼人
翠樓不覺蒼茫暗水口汎川風景一時收

槐堡晴嵐

射虎將軍駐五兵戎小市接山城槐生兔目留雙

樹旭引雞聲出萬楹水氣蜿蜒侵案濕嵐光斷續拂
木輕屏山日暮朱霞起倚徙殊深今古情

五峯鎖秀

五鳳山高插碧空蒼茫影落暮雲中朝生潤氣還成
雨夕建霞標欲化虹似涌螺屏圍八澗應通地脉接
崆峒有人學得長生術共采芝英到大隴

七級凌空

浮圖嶽嶽傍祇林忽闢孤園徧布金八部龍來扶地
軸七層鳳儂下天琴銘成孝武烟常鎖勢壓慈恩霧
半侵阿育圓功已八萬曾留寶刹鎮城陰

三水縣志

卷之四

卒八

翠屏新霽

南岡積翠列如屏雨後蒼涼曉氣青練挂懸暉留宿
霧嵐囚老樹隱殘星山痕帶滃朝圍堞艸色含煙暮
入廳好向舟樓深處望巒花渚柳眉前汀

石闕舊關

怪石森天關一門誰提十萬作兵屯秦儲湫濬蛟龍
窟唐帝關關虎豹垣箭插溪通爲颯穴捲連石起卽
雲根雖然吭扼雍州界鳥曠何妨守巨籬

玉泉古柏

老柏陰森覆碧泉霜皮駁駁不知年根蟠十晦青銅

古葉綴千尋綠結鮮倒挂虬枝常溜雨遙飛黛影欲
參天良材久有精靈護鐵骨曾經幾代煙

山寺聞鐘

幾處鐘鳴過石磯化城夢破聲微微悠揚欲帶朝雲
落颯沓遠隨暮雨飛午夜更殘空色界中天月湧淨
禪機聞音悟得無生理獨坐松窗萬慮稀

武亭紀事

有引

林逢泰

邑人

歲在亥楊月旅糴實余重脩演武亭蓋文事武備
意也浹旬而工成於是召邑之魁魁者較射試馬
於其間爰題其柱曰干城映縣花此日雄風開翠

三水縣志

卷之四

六十九

岫原隰環營柳千年佳氣蔽雲臺志喜也余謂斯
亭習射講武固也卽耕者旅者可於此而避風雨
焉有遠行者可於此而祖餞焉又邑之厲壇舊在
東郊余以爲非宜改置西郊捐貲購地適與西壇
毗卽在場之左凡歲時享祀亦可於此而更衣盥
沐焉是非徒以演武且以觀禮矣并紀以詩

七月幽風五月寒綢繆未雨擬登壇周家元老歌方
召宋代軍中識范韓洗甲何妨膏稷黍穿楊况可酌
椒蘭由來王國多桓桓遙望渭川拂釣竿

和韻

文倬天

邑人

淦淦郊雲炤水寒群傳漢將舊登壇三時菱舍今推
召五色卿雲已見韓共憲觀兵追細柳誰能琢句和
幽蘭會朝堪奏鷹揚績曾向磻溪把釣竿

又

文龍軒 邑人

誰使西人心膽寒武功今日在文壇願從較獵忽知
李復喜激雲久識韓二澗流風舟仍玉一川芳艸嗅
如蘭于今不借維屏力翻笑徒勞篳篥竿

同亭觀射 有引

林逢泰 邑尹

余公餘之暇閒步署旁周視有射亭舊址在瓦礫
中爰闢其地命胥役壯丁習射以脩武詩云二之

三水縣志

卷之四

七十

日其同蓋幽人遺風也亭之左右環植樹木尋得
一井甃之以資灌溉令民間有願農圃者聽耕種
其中斯亦與民同之之意也仍舊址築一亭爲觀
射之所歲甲寅重陽工成名之曰同亭偶集文俶
明司理王福宇守戎張克其孝廉第五文昭文起
二太學觀射俶明賦詩因并紀之

築場爲圃與民同追步郇邠拜下風懸榻花前隨王
塵焚香夜半和丸熊雲間鵬落鏃如樹塞上騎輕雪
滿弓極目郊原空抵掌且將萸菊莫論功

感懷再用前韻

誰賦無衣與子同屏圖難更繪幽風夢中旌旗翻蕉
鹿河畔留星映獵熊沙苑鴈群憐帶箭石鞞禪榻笑
張弓吾儒深負蒼生願投筆何能早獻功

和韵

文倬天 邑人

篤公講武頌其同亭上威生艸木風雨澗寒來堪于
貉三單教就在非熊霞觴徧注躋堂酒月影常隨較
射弓讌飲不關行樂事澄清汎水有殊功

又

張壯猷 邑人

匪康近與古人同千載幽郊咏舊風戎馬不生看走
馬非熊小試簡如熊漫勞羽扇飄舟王且向匏尊弄
三水縣志 卷之四 七十一
畫弓湛露未晞歌醉止三單默就不談功

又

第五淑愈 邑人

昔年奮武奏來同此日威稜振古風醪飲中山騰士
馬凱歌南國壯熊能懸侯射的看調矢獻馘舉旗有
角弓郊野清平成盛治登堂洗筆慶元功

又

文龍軒 邑人

幽公此日慶攸同猶是當年纘武風農隙不妨懸正
鵠狩餘爭羨盡如熊西來月窟全斟酒北望天山好
掛弓一紙能賢師十萬誰將頗牧奏神功

又

亭上秋光四野同，座中綸羽快生風。
指撝列陣排空，鴈咲語高旗。
應北熊，汎水沙清堪洗甲，屏山煙靖莫張弓。
願將杯酒釋兵事，蚤上循良第一功。

又

馬三錫 邑人

奮武揆文事，豈同幽侯談咲樹。
長風宇中幾處嚴刁，斗郇上而今比豹熊。
自是循良能守土，非關州閭善彎弓。
巖城莫道勲試淺，鎖鑰千年頌寇功。

又

林逢元 晉江人

木落秋聲處處同，迎寒射獵自幽風。
屏浮積翠堪駟鶴，石躍沒金可似熊。
細菊泛杯長倚劔，垂楊環圃動

三水縣志

卷之四

七十三

鳴弓霜華遙拂烽，烟肅脩武應知續武功。

又

林繩謨

兩度函關景不同，脩矛今復賦秦風。
學詩祇媿庭趨鯉，講武誰能圍格熊。
井冽泉光開水鏡，亭涵月碧落天弓。
獻豨自是幽人舊，竚看氛銷飲羽功。

又

文龍標

西郊爲報射夫同，如堵欣瞻相圍風。
緩帶曳雲丰皎皎，長歌續雅氣熊熊。
傾盃怒繞龍泉劍，飲羽爭懸飛衛弓。
不戰屈人真大勇，旭光銷盡是元功。

再登舟翠樓用同字韻 楊紹武

城上樓臺今古同我來極望眼全空石門絕巘千峰
外皇澗清流萬壑中王氣銷沉餘墓道聖功締造見
幽風憑欄無限悲歌意不爲浮雲惱塞翁

龍山八景

文倬夫

龍管飲練

瓘龍昂管下青冥化作竒巒臥艸汀醉隱壺中閒日
月人推彼美在榛苓漣紋百折環河帶翠靄四圍繞
岫屏一綫寒烟通鳥道深山無事戶常扃

懸崖柏靄

嶙峋石上枝披離鐵幹中閑隱士基一片寒雲添黛

三水縣志

卷之四

七十三

葉三春凍雨老霜皮孤巖有路苔花鑽仄逕無人棟
子垂空翠繽紛散十畝山光樹影共催詩

曲徑煙雨

綠樹蕭森絕徃還逶迤曲徑白雲邊自開三路追陶
令誰躋六龍上蜀天峽氣朝昏能作雨松陰晚散半
飛烟花木從此通幽處潭影空明亦是禪

石梁晚照

太乙山人住綠嶠斑龍五色橫成橋涵潭迤照翻懸
壁窳窟衝風亂怒潮日影三竿起蜮箭奔雷百尺過
虹腰空梁鶴唳溪前艸坐對寒雲萬慮消

古寺踈鐘

蘿封敗壁少人行，斷碣殊深今古情。
鷺去雲昏香水海，鯨號月湧琉璃城。
堦前艸引悲風起，嶺際鐘催爽氣生。
紺馬幾時歸極樂，苔痕滿地暮雲橫。

靄泉飛玉

紅龍艸畔見虬潛，水氣橫飛密似霰。
忽遇深溼通海脉，何時卓錫出風尖。
三春玉瀨咽高澗，百道銀絲挂古巖。
不厭寒冷止洗耳，清流自酌淪茗鬻。

平山落瀑

奔流界破翠微東，每至松溪憶遠公。
絕壁千尋拖匹三水縣志

卷之四

七十四

練晴光百尺挂，垂虹湍懸沆茫朝。
如雨谷混涵虛暮欲風悞認廬山三月瀑，波飛亂石下空濛。

孤嶺松簧

輕陰半嶺落青霞，誰種蚪鱗出斷筴。
葉送寒聲撼扁豹枝搖澹影走龍蛇，非關雨灑大夫澗。
饒有風清隱士家，一夜笙簧來兩部。
孤峯高臥興還賒。

七言絕句

感咏

秦渠

畫鼓鼕鼕坐夜深，國儲民瘼總關心。
使君漫道微官短，巨眼還須看後人。

九日過弟蘇園

文翔鳳

貂裘與汝耦烟膏不向人間問蒼問天濶且看鴻鴈
度黃花白髮正雙新

幽署秋感

休逢泰

翠岫秋空碧可晴荒烟斷續壓山城手無釘斧徒憂
杞露白行間聞曉鳴

武亭泮水幾經營百雉高樓一手筆極目烽烟迷野
戍當季悔不請長纆

羽書雲駛客心驚新築西橋汎水泓聞道萑苻全解
網恩波倘可起魚鱗

三水縣志

卷之四

七十五

山郭蓬蒿路徑盈金風搖落酒帘輕轆轤并深悲鴻
鴈市上醉人已半醒

空塔獨步拂花楹不待重陽菊蕊榮寄語醉鄉今
落白衣湧許其呼航

籠香軒北脚菁菁手撷葡萄似水晶莫怨螿娘琴裏
入屏山鶴唳九臯清

菱柳亭口占

有引

甲寅乙卯間遭亂余城守戒嚴有云西堡爲昔避
患處官署倉庫在焉蓋圖諸余毅然非之繼逆氣
猖獗及於難人皆咎余守經而不知權余無以詳

乃嘆昔人剏造良有深意且憑高臨險爲城保障
因捐資鳩工仍舊址而鼎新之乙卯秋築右橋曰
縣橋蓋周之初生始於幽所謂縣縣瓜陟者丙辰
夏葺其堂曰井勸按井爲幽分野而易云君子以
勞民勸相竊有志焉復顏之曰鴻冥鶴和蓋一時
未能高飛遠舉不得不冥冥以避弋慕而君子居
其室出其言善則千里之外應之出身加民乃鶴
和之義以自警也堂後築一亭取材於一柳而成
文傲明先生手題曰芟柳昔陶令門前種柳余今
以柳爲亭斯亦傲陶之意而傲明乃欲以柳傲棠

三水縣志

卷之四

七十六

固幽人忠厚遺風余益慙然浹背矣率爾成韻

西方彼美歎榛苓遠眺石門雲半肩夾澗垂垂驚
慕一枝寒碧掛鴻冥

孤鶴凌霄遶翠屏鳴陰子和迥郊垞不知何處吹羌
笛絮起霏霏葉滿庭

當年舟王響瓏玲此日雙槐再結亭漫說輕陰留瓦
影呢喃燕語入踈櫺

東井分明燦列星寒泉河酌小橋滄石頑恰對真人
洞乞得楊枝水一鉞

百尺樓頭手一經焚香紫几讀西銘祇慙襟箬開三

徑漫浪去來夢未醒

昨夜蟾蜍吐火熒曉歛幽鼓雪風零誰將玉斧斲槍

掃獨上高臺更問青

仲春望月紅如火

奉和 林父母泮宮告成韻

馬象麟

邑人 桐廬令

誰云廟貌古觀聽環橋新日旭一陽動宮懸六代陳
化同文被蜀教似常開閩壽考作人遠香生桃李

又

馬乾吉

邑人

何年鐘鼓地此日泮池新猶憶三千侶欣聞四教陳
音聲遠接魯色笑近宗閩祝拜作人壽勝遊泗水春

又

童子煒

晉江人 安化令

三水縣志

卷之四

七十七

盛周基化地泮藻復生新緹室一陽動璜宮六藝陳
文瀾澄汎水旦氣亘南閩猶憶筍堤雪塔深長坐春

又

林國珩

晉江人

萬年開勝地尋尺萬年新雨化宮墻煥風光桃李陳
絃聲宣嶰谷藻色漾泉閩共喜幽陽會長存旦氣春

賦

夫詩有六義其二曰賦賦者古詩之流辭之大者與卿雲之頌網罟之歌同致釋名云賦敷也敷布其義君子以見其志也詩人之賦麗以則詞人之賦麗以浮台棊組以成文列錦繡而為質其金石之聲歟西京作賦獨推少白太青橋梓金陵十二首已芬人齒僅錄其切於幽邑者以垂縹緲豈特登高

賦為大夫之才耶

北征賦更始時班彪避難京州發長安至安定作

漢班

彪

郡人徐令

余遭世之顛覆兮罹填塞之厄災舊室滅以丘墟兮曾不得乎少留遂奮袂以北征兮超絕跡而遠游朝發軔於長都兮夕宿瓠谷之玄宮歷雲門而反顧望通天之崇臺乘陵岡以登降息郇邠之邑鄉慕公劉

三水縣志

卷之四

七六

之遺德及行葦之不傷彼何生之優渥我獨離此百殃故時會之變化兮非天命之靡常登赤須之長坂入義渠之舊城忿之穢宣后之失貞嘉秦

昭之討賊赫斯怒以北征紛吾去此舊都兮騁遲遲以歷茲遂舒節以遠逝兮指安定以為期涉長路之緜緜兮遠紆回以樛流過泥陽而太息兮悲祖廟之不脩釋余馬於彭陽兮且弭節而自思日蹙蹙其將暮兮觀牛羊之下來寤曠怨之傷情兮哀詩人之歎時越安定以容與兮遵長城之漫漫劇蒙公之疲民兮為強秦乎繁怨舍高亥之切憂兮事之忠

不耀德以綏遠兮顧厚固而繕藩首身分而不寤兮
猶數功而辭譽何夫子之妄說兮孰云地脈而生殘
登鄣隧而遙望兮聊須臾以婆娑閱之今
弔尉邛於朝那從聖文之克讓兮不勞師而際加惠
父兄於南越兮黜帝號於尉佗降几杖於藩圉兮折
吳淠之逆邪惟太宗之蕩蕩兮豈彊秦之所圖際高
平而周覽兮望山谷之嵯峨野蕭條以莽蕩迥千里
而無家風焱發以飄颻兮谷水灌以揚波飛雲霧之
杳杳涉積雪之皚皚雁雖離以群翔兮鷓鴣鳴以齊
濟遊子悲其故鄉兮心愴悵以傷懷撫長劔而慨息
三水縣志 卷之四 七十九

兮泣漣落而霑衣

覽

涕以於邑兮哀生民之多故夫

何陰曠之不陽兮嗟久失其平度諒時運之所爲兮
永伊鬱其誰愬亂曰夫子固窮遊藝文兮樂以忘憂
惟聖賢兮達人從事有儀則兮行止屈伸與時息兮
君子履信無不居兮雖之何憂懼兮

鉅賦

明文在中

邑人

禮部主事

邠之胡叟戲西極子曰若之半川何如邠西極怍焉
有不服之色拂纓而前曰是何言歟夫雍乾方也於
北斗屬其柄第一天下之勝在雍雍之邸在邠邠之
秀色在半川將挈海內而來不足有所加邠河論邠

之胡叟垂胡而笈曰老夫病偃僕不能任屨杖造雲
壯覽鴻槃固氏惆焉爾爾內闕也雖然終頌聞之西
極子扶胡叟於座徐對曰文人居母幪小子臚之以
代丈人之王趾夫邠之大原三而半川則獨吞后稷
公劉鞠陶慶節皇僕毀論九世之靈焰乎中條東以
棗池爲扃牖西則秦羽作邊陲南望則踰雞紅之嶺
北據則峙堡嘴之屨此其川之四極大略也迺爾宿
應井鬼之野杓執華山以西邇則胞脫於石門遠則
瓠孕乎崑侖故其來歷最遙氣鬱滯而波紛紜也嘗
其背夏涉秋水潦四至大雨流行洶湧之浪輻湊而

三水縣志

卷之四

盈則吾川門庭之外遂成江河可以運鱸舸西有巨
池注泡集之波方十丈溢則洄旋而出沛乎西馳漫
衍滂沱獵於石澗趨涇之波舒鳧野鵝於是乎濯羽
焉樹之垂柳環爲林羅說者謂王氣叢乎茲湫故繡
斧公之後獨蕃衍而犷讎若其餘沫流灌底於下隰
階而爲堰遂作隩區號曰神臯厥苗齒蒨厥土翻膠
黍稷幪木卉薈苞懷槐百常環列街巷隔之樗蒲
搖以垂楊白粉之枝飄隨風颺士女萃蕪歸自隴畝
或耒或耒不見紅光若夫季春之末綠草縹縹鳥鳴
洋洋女執懿筐遵彼微行景我先幽求我猗桑或採

葵菽以和蔗漿或籠斝莫或絡赤莧或擷鬼日子如
耳璫或載水臺以碎梗殃或篋鴻奮或收荅蒲或刈
蚍蜉調於黃梁鳴鳩拂羽戴勝旣降結爲鞦韆或學
鴛鴦梳視袿袿袂張張舞絙而熙襟裾垂芳禘帶
纒纒碎彼烏翔縞佩委委香纓瑒瑒暇則治葵占供
盞勝洗曲脚之鬲烘附耳之鑪農夫荷鋤鍤而歸則
爲之烹黃雞以蕩暑氣傾康瓠而酌蔬漿或拖衣於
旄則累月或捲衾於第而落霜夫豈贈芍藥於消水
采唐草於洙鄉冶容而蠶以媠卽嫫之武惠胥宇之
姜弛昧且之警而湛於太康也哉乃觀南宮以北羽

三水縣志

卷之四

十一

鎮之東禾黍徧野膏沃而豐畛罔磽确與秦隴同千
耦維耘麥浪扇風織夫須以爲笠張桐葉而隄空燕
麥兔絲雜於糜戎蒿藿野菅綠澗而生溽濕之涯或
敷蕭葦池潦之西則有羅溝萑葦泝焉菱荻爲菜溝
之西陂有水涌出方四尺餘澄映清甘執杓而飲之
則金光照耀焉謚曰金泉是爲吾川之名瀏學士俊
髦掘管之思所以盪澗不得而灑存幽想溶溶潏潏
者也泉之東北堡嘴峙焉方九百畝而築之四面巔
巖緣脊而脇旣曠且遐極望焉或不能臨深崖百仞
載夷載嶮蓋盛時屯兵禦寇之大鎮蕩爲坵墟芻此

得臧竊憶余垂髫吟書之時倦於筆墨也則挾髻童
一二訪牧豎於岩阿適遇夫擔者荷禽鞭羊互歌予
亦釋黃卷而兒嬉弄夕陽之蹉跎或呼虻蚰以奪梟
或擲腰鎌以注莎或摘天瓜以寄食或挹鉞弋以束
菽或飲於泉或偃於坡縮龍鼓以爲枕刺薊拏之婆
娑當斯之際掘蒿爲糧編蒲爲騎羝拏鬣稚態紛
孳野花攜袖靡事不佳豈復識天台之孕五芝而焦
蓂之獻三禾哉旣焉偕五六以干歸捉莎雞以寄籠
睇遠邇之村落欣樹木之萼茸色蒼鬱而不斷若匹
練之相縫雲影儵眴以憑巔峯坏差池而埽塙暝色

三水縣志

卷之四

八十二

坱圠而靡岸清風颯颯而來韻檀爨嬋娟媚景如玉
令人顧盼而不暇語笑澀喜而不能息雖課讀於比
舍亦躡閒而游佚至其花紅水梨羊棗櫻桃之屬則
徃徃而有角巾取之非所悵惜治薔牡丹石竹雞冠
金盞玉簪薔薇紫荊縱無洛堤並楚圍樹之書圍與
後苑胡籬紛飛蜻蜓互見誦聲稍停投壺設宴序天
倫之樂事窮子姓之繾綣步長者之後躡或倒幘而
游衍觀河不殊於恒沙鵝籠已寄於陽羨嗟蘭亭之
已徃過離黍而三嘆傷濛汜之淪汨思賜谷之初餞
寓蟬蛸於朝暮何紛靡之足戰脫南冠於楚囚解天

以自便大運委諸陽九胡流涕而掩面蓋我高祖
待御公之垂枝旃乎來茲也實一葉而百綻三日不
食土壅厥面長孺過而太息朱雲望之流汗故其遺
澤流乎後代夫既九世而不勝其餐啖邈我中祖東
山公之耕石門也以布衣而萬鍾初無瓦之一片壽
八袞而兒五如王樹之麟爛鴻基爰創於白丁拂髯
不負於載弁天倉決而不涸來雲頌其青盼太學公
倜儻而博交發璞而王術六葉逾茂四龍咸宦陰寬
平以宅心不作色而樹善冀州公學綜而才高軼唐
宋而躋秦漢名震北斗以南辭爲函谷之冠維二兒
三水縣志

卷之四

十三

與兩孫頗能襲其琴劍天昌厥後遠萃霞烟陟生九
葉蠶出八眠若夫大竹暢風流於物外步艸書於張
顛壺關性敏達而通方判案牘如席卷紹興記萬言
不崇朝倒黃河於翰端奪南宮之炯錦振清譽於芳
季少公挺淑質於妙齡掃千軍於筆椽染墨精於羲
獻侍西清之細旃惠淵髮賜達而求藝少蒼亞仁孝
於淵騫滋庭前之奇樹走明珠於玉盤至若松盤公
鍾黃鶴之清骨餐丹藥而引季棄功名如糞土繼五
湖而撐船建昌公負九尺之長軀毓本性於澹恬恥
狗華而逐物隱光曜於靈泉東川才崢嶸而能言經

世故而抱謙商水遇事至則嵐生罔藻飾其幅邊羅
江若心思而篤志樹名節爲籬籓別駕挾科第之偉
器拾紅埃於晚年斯皆西伯氏之苗裔抑或潞國公
之支派者也何行事之迥遠而滲思之湛沉洵可垂
青竹而不朽奚不付姓字於史臣抵某小學後輩焚
膏油於青燧慕曹劌而哦吟驚騏驎之濶蹀激毫光
於青雲領武庫於滕王賦鸚鵡於芳樽拂鳳羽於霄
罈出鵬翮乎蒼垠戴總不盈於五尺咸希班馬而撰
文白肩於焉却駕七步爲之斂襟裁尋章而摘句輒
撥醕而飲醇豈非天之所授祖惠之蔭哉且謂爾將

三水縣志

卷之四

十四

何以臺之胡叟作邑而起命西極子曰聞之多錢善
賈長袖善舞崑山多玉冀北多馬皆神鬼之所幽張
非可以人力巖而圖也夫蜚英名而勒鴻伐厥宗則
輩不匱人洵可陋顧陸之大姓於江表而小謝王之
名族於西都矣但區不過十里之內而欲譚百里之
溪山辟諸鸚鳩不出乎蓬蒿借前箸而思與大鵬窮
宇宙論扶搖豈不悖哉粵三水之始置縣也實公跡
乎公劉之故丘蓋夫不密窳於戎翟邸之篤公劉而
民麻赤鳥將啣書以授圖夏殷挈疆陲而歸周遂陟
嶽而降原佩鞞琫以定籌振鞠陶之頽運顧差弗而

爲謀歷古公與高圉延九裔於澗陬當夫昆彛爲紂
之始亶父走馬之秋則西伯聖瑞胎孕乎此發之黃
鉞昌之明堂潛伏陰黼而權輿其萌勾非卽江漢爲
界割三隄而二之世袍襴而箕裘已招手嶠函之外
而朝八州逮夫泰誓八百於盟津之戊午建萬國之
社稷如坏壤齊州幾點作浮煙九鼎剖裂成水漚是
時伯邑振鐸康叔邠載而下則有若我文考之第十
七子焉雖不紀厥名於公穀左鄒實削桐葉胙茅土
於邠郟鄆毛魯衛之外封此柁邑而爲侯於漢則孝
景沿之爲柁邑元光更之爲三水新莽復柁邑之故

三水縣志

卷之四

八十五

號太武隸三水於恒州大業移於隴川廣惠遷於職
田至正入於淳化成廟屬諸邠州十二而爲里里名
則肇於三流蓋指芝川梁渠並縣河而得名若秦王
泉白馬稍泉廼津之濺濺者爾縣之立號豈緣此爲
由哉志者曰公劉故城在今之邠東北五十里蓋度
夕陽而幽居允荒不聞渡涇水而造梁設舟注幽者
曰幽在邠州之三水則三水爲正地而邠假冠之邠
無南岡容刀何陟或者睇隘巷之坊而息后稷過公
劉之里而夢褭餼則遺腹繪父而貌非肖燕人涕慕
而泪空流越惟東距嶠坂西吞隴蜀輿鬼之精散爲

雍州自鬼谷范蠡諸葛譙周咸云東井十六度至柳
八度爲鶉頭氣運乎北地與上郡下滲諸秦陶之古
湫則峪口甘泉以北天地別爲一區與廢背向之源
執管者嘗得而不細相校讐夫邠據於盧芳而歸莽
帝克於吳漢鄧禹而成奇功石洞屬於官家煙燼至
今有蹤二帥兵留殆數月以故得圖雲臺而與伏波
競雄君集小人王佐請稱職田故址尉遲築城五倫
決聖主於京兆范曄序橫渠之正蒙希文走下吏而
飛檄焦寅釋中庸而談兵少陵軻岐陽以入鄜叔皮
館邠邠而北征後望赤湏之長坂前臨昆池之右坪
三水縣志

卷之四

六

名賢經之豪傑崛起雖彈丸之土揆厥所來嗟難得
而歎石叩竹以鳴也夫三水固蕞爾小都富腴非涇
原諸郡比然在殷周之際剖符之期則爲方百里上
公之畿山川包羅勢如布碁迤邐環遶於澗石疊嶂
之中馮隆蟠屈芒芒旣旣如箭括之相通扣石而啟
扉肖塤張浮圖之七級雞阜負巨卵而威威磯嘴巒
溟而產鱗翠屏蒼鬱而前垂蟠龍曉峩於西鄙萬高
嶽崧於南陲唐山崆峒寮刺於神樹之嶺馬羅狼牙
蘭陵鳳皇巖嶙嶂嶙如震如怒壘芥焉而掀其髭鬣
戛而樹旗由茲乎窮極於東北之隈則排積綿亘歲

裹而羅列者殆百里長者如蚩尤之揭竿短者如巨
靈之負橈矮者矍矍焉如競貓之閉目卧雉者矯矯
騫騫如犂牛後甕麟駟而垂鼻犍鬣髻靡泣乎林
木而喊嘶豐者如雲邈者如霓伏者如寢橫者如籠
自分水之岫迺乎金窩之陂隨地殊稱多坡陀之狀
難枚舉而翳闕則見其丘之崙者三襲融者再崖乘
者如輶階者如離京者如榭泥者如啤梧者當途埒
者波趨蜀者孤峙歸者衆圍甌者甌覆墮者蛇透或
夾水而爲澗或夾陵而爲澗或穴出而爲沱或下溜
而爲渠或過辨而滌洄或溪闕而扶疏或泄尾而爲
三水縣志

卷之四

二十七

澗或掩沙而爲瀦或注谿而爲谷之口或注川而爲
谿之間則由東澗西溪而上尋溫涼之脈絡詰柏林
之洲淤登蒙恬扶蘇兩女之寨而憇馬過秦襄姚泓
八二之城而命厨神兔之茶飲之助臞坂川之藿調
飛之舖解衣而臨萬壽之淵則重耳之駢脇可覩執
匏而酌觀音之湫則沙蹄之駱駝何須夫三泉之澤
豈足盡幽谷之膏腴以供雲英之漿而釋渴麻姑也
與哉剛耳於黑石之巖以劓硯束茅於攢天之嶺而
結廬則石門之神扶蘇之英魂儲焉惟此石門邠人
謂之小終南竹箭糴薪雉兔狐狸於是乎輸以比於

楚之九百里之雲夢而齊之渤解青田孟豬焉以爲
百物之藪貨殖之府而資平蕪方予少歲爲學宮弟
子或三輔池陽有試事相譴諉則過此是時也登天
峯以獨盼解馬鞍於高岡戴蒲弁以傲日流汗沫而
成漿路刻峭而岳巒歷九灣如羊腸崖谷虺豁而相
視石齒燾莽以誦張虜青磯以崩落聲砰訇而磅礫
選鬱律乎蛇盤越垠堦而鳥翔至厓隙則魂恐足踈
跋焉自防驚萬仞之屹嶮攀危枝而悼傷披豐萼之
茵蠢葉儵爚而閃光紛晻曖以蒼蔚天暝暝而芒芒
草黝靄以無際棘扶踈以刺裳蠹嬖姍以陟危衣狎

三水縣志

卷之四

八

獵而弗註體已憊而騫翥猶抗色而陸梁或要屈而
下却與山勢而低昂越磧礫之灘抵躡丹粟之滄滄
涉溲澥之小波或哢吮而聲決瀾濺潏而不止出潛
盪而天昌惟沿河之一帶多水石之激揚波砢以
輞輒乘古岸而稽穎泉闢竇而披灑石礫砢以相允
或溲澥而竿濫或渟渟而卷簧或灑潏而翻雲或流
湍而投洗或漉溢而相赴或提壺而增觴或邊躑而
蹶躡怵棧倚之非常或逢渟而煩鬱或奮溱而灑洋
或百步而一曲或三里而設梁何日登乎廣原令我
思夫康莊惟石門之一支與郵延而襟帶躋中條之

絕峯訝嗽噦之相拜間娛遊以陶情或爬綠而節息
激酸楨以激洩餐杼桃而豁瘳啖接慮以濯薰摘山
檟以網袋蔭鼠梓之落葉衝山壘之葑蔓傷百尺之
癘木病雍腫之樅檜斧栲枝以作杖採薇蕨而爲菜
治印鉅以供藥遂蹕蹕夫蕭艾剪萋楚以爲索繫木
瓜以下瀨羨以秣之微草競唐蒙而翳蒼僕夫踣其
後步盜馬蘭而首戴於是乎轔轔亂鳴鷓鳩過澗鷓
鷓催穀天鷓脫絆鷓鷓戲水負雀林戰鷓鷓高揮戴
鷓食亂白猓爲之驚怖猿獾爲之遠竄狸狝懼而歸
穴安所追夫麇麇至其濡濕之阿陰淫之塹馬蜂作

三水縣志

卷之四

卅九

巢於蓬科次蠶結網爲蚋患螬螬婬娟而散糞卽照
獵腐而弄電蚘羸不知有蠻觸蚍蜉聞羶而相勸蟻
銜入耳而致惕豎蠶貪倉於壤片蛄螿毒其八角天
牛飛而脚曼螫蝮怒於深池蛄螿奮於穢賤蠹蟹不
可以聞蚣蝟徃徃紛見鼠負潛於石底蠍蠃羽如匹
練虹蛭鼓其四翼翰雞來而燭閃善萬物之得時傷
吾生之多患警軒冕之爲榮如東園之桃綻胡垂咽
於蠅足出域外而肆嫚入桃源而結茅獨白雲之堪
盼夫一縣之地可比古之侯封詎止訖已而已乎四
野之曠樹木丰茸更僕論之弗能狀容若夫遠客卒

至酌羽觴以銷憂悵則八景可懸諸盡屏何蕭條而
鬢鬆灑雞頭之烟兩披槐堡之晴峯盼五巒之鎖秀
睇七級之凌空躡公劉之故址陟玄極之新宮森王
泉之古柏撞山寺之晨鐘登眺之清絕起繩床之
懶慵侮造化而肆嘲出小兒之樊籠悟拳石之爲山
識盆波之潰漚雨靡地而不足何致禱於土龍夫幽
東至於紅山百里而遙南至於姜濱五十里而遙西
至於炭溝五十里而遙北至於岱坡五十里而遙東
南至於滌沮百里而遙西南至於奉天百里而遙西
北至於義渠百里而遙東北至於橋陵百里而遙隔
三水縣志

卷之四

之以三川間之以九溝立號於漢唐創基於殷周斯
亦天府之上國西北之雄都也故授衣鑿冰爲幽風
楚茨大田爲幽雅載芟良耜爲幽頌擊鼓殺犉爲幽
箒季子觀樂而至邠曰周之本乎首二南而尾之幽
風之極美之至也王道之終也談秦而不談邠則形
勢有餘土風猶惡由此言之邠何負於秦哉夏虫不
可以語冰罔螻不可以語海挈子之川而易此雖附
之文馬百駟拱壁三穀紵繡千純珊瑚七樹連城雖
往和氏不來沙丘虧價徒築駿臺彼且遑爾而不肯
受况可與之度量尺寸相與準折而爲市也西極子

再拜謝曰小子不敏不識忌諱據今晨之所聞臨邛
者之所見海霄相懸何翅梟牟乎哉夫觀廣陵者不
視釜沸登蓬萊之絕岫者不遊乎洲嶼願先生進之
門牆毋棄過斯以往余將可語大理矣

快新秋賦

文翔鳳

秋六日吾以降維時收恢台之溽暑快其新爽滌
人爰解朝而賦之一曰反九辯

秋何爲者拚壹是詞人之惋咨而悽斷我獨別取裁
于肺肝翻向來浪判新秋之老案爰楚人之沈慙而
寡歡遂濫觴于悲哉秋之爲氣之一辯怨夫懷予之

三水縣志

卷之四

九十一

口實以交并也亦疇掬澹靚之光容向五情而灑練
若夫宋王之所稱悲見草木之搖落則往然于蕭瑟
沈嶮之變遭薄寒之中人則慨其有宋寥增歎之歎
旣以爲登山臨水者之送時歸于遠行又以爲失職
坎壈而羈旅者念廓落之友生蓋亦就杪秋之遙夜
數忽忽適盡之歲華旣感遇中煩之不可解又霜露
之露其交零也霰雪之零其糅加茲愴悅曠懷乎其
和魏堂之蟋蟀繼秦水之蒹葭以抽摠其懷沙哀郢
之餘所不堪抑遏于情氣之疵傷而煩拏于是太白
去國入楚亦盡以清秋爲可悲也陟則九疑聯綿之

雲莽舜林而互之降則三湘森遠之樹洄澄湖而遡
之望寒流之歸海計鳥道于不知幾千之故鄉曠佳
期之脩阻怨荆吳之天長至如河陽華省少陵白帝
竝攬興于稟秋咸哀思之激厲潘則云稿葉殞而屏
筵庭樹撼而袷衣颯班鬢于蟬冕思籠池之或羈鄴
優游于山阿指李歲以爲期杜則云菊開叢而啼淚
楓凋林而傷心接風雲于陰塞催刀尺于急砧冷滄
江之寂寞渺巫峽之櫛慘爾其礪磅披離而爲聲有
爲之哆箕舌于虛無之槌機不在萬柯耿耿之衰噫
百蟲嘒嘒之啁鳴夢得緣之以騷伊鬱永叔緣之以

三水縣志

卷之四

九十二

感夥星肆乃愴鷹驥之就絡據脫梧而神驚羨金石
之獨堅戒動物之搖精之數子所謂食六爻之碩果
履九月之肅霜蹇產佗傺之不得其平者辱抑未竟
新秋爽豁顛森之狀矯飛颺其洗洞睽而暢坐情若
乃鞭則且以徂歸延室相而徠馭商火警其初流天
梁擘以乍度捲恢台之炎蒸向旻空而披素戛輕條
之琳風團清階之飴露擢金莖而潑雲起蘋末而躋
戶于是天宇晶而氣朗燿黛淺而林開山將月濯濤
與鷺迴數穎菟腹鏡浸樓臺掣練星河砌引瓊瑰謝
淫燠之驟失披荔裳之顓裁譬如背闔塵之湫樽上

王堂而延佇出湯泉之星痕卽蓮井乎霜沍展子求
于蹢躅忘五管之指天聽枚叔之要言立據几而霍
然其泠泠耳目之發明以曠曙也有如公石過中山
之肆壽陵躡邯鄲之倡不自知其葬醢骨以郎索戀
錦瑟之迴翔以三年爛熳不寤之醒狂忽破酒于醉
鄉以十旬流連愴歸之嬉荒俄改至而周行我乃旣
及板織女之車又全睹嬋娟之面乞王杵之搗霜望
瓊樓而授宴居然墮青天于飛羽之筵逼麗月于步
光之劔骨相清輕肌體便寧識塵非故契分全更瓊
襟坐照重鑿心竅玻璃架明水晶塔妙何如華胥緣
三水縣志

卷之四

九十三

空櫻桃夢斷顧仙翁其在傍繫樞頭之款段神出遠
遊幻蛻如委陟紅樓之三級遂辭訣于苦海自非擺
脫嗜慾之涂滌蕩濃豔之區旣芳沐而蘭浴悟性界
之清虛覺直前之綺麗爲空華欣過此之澄澈爲太
初其疇克亮新秋之皎潔若置身于玉壺者厚故曰
盛夏芒芒綺陌花坊百靈纂組萬卉寶粧綴粉黛爲
禮樂恐天真之見戕新秋皓皓璿嶼瑤島拂掃天門
滌除月道躋世界于神明喚浮生于白曉羌獨快其
謁太素之真空還上公之舊貫不藻績而示竒尙精
光之神變揭空冥于虛霽信四氣之特冠衆莫解兮

化工儂却賞其魁岸茲乃知以氣骨代色澤者天地
之真文章壯仙掌削青之太華陋錦湖搖碧之錢塘
譬如頽波之流濫于六朝者至狂隋而靡返突起一
八代山斗之主遂立筵從來揚簸之塵糠彼夫以針
絕絲巧當造化又渠識刻露峻聳之爛芒我將豎西
極之孤標領南國之衆芳拔爾于祝融毒烈之溼復
爾于金天靚曠之堂慎毋以天賜六經之管爲煙弄
花娛之具以得罪于戴匡氏哉自茲應不向我重夸
劉宋與蕭梁遂因寤聖人提群蒙之大寶果不在枝
枝葉葉之遠揚抑此景之可想其氣神武而不殺密

三水縣志

卷之四

九十四

洗心以退藏者虛不似副墨洛誦之旁馳而橫驚著
三千霜俄有一皇極翁立先天之白表以圭測于三
百六十運之中央于斯見支離易簡之不可同調而
語持論者宜繩準以精神之透露奈何徒磴磴苛督
于氣象之溫恭乎禮法之趨齟且若不見新秋之適
中而捐戾雖火政之初收尙金風之未銳季已脫烘
燬之酷豈遽罹霾靡之害旣蘊隆之剗鋤又芳縟之
菴藹溪有苕錢萍實之縱橫塘則藻網菱冰之映帶
魚款潮門之交游蝶赴籬落之期會挾苔痕而得泉
待篁篠之過籟時則芙蓉可以緝裳幽蘭可以紉佩

采浮金于桂粟聽輕王于芟蓋雲雖薄而故閑鷓益
清而善啖不以文而病質良天公之所貴清明之氣
遊飛顛皜之色交綴江容爲之噴醒峯眉爲之破睡
走法象于珠盤亦何勞于圖繪計宵且則平分閭陰
陽則鈞萃方上春之和妍彼以進而此退顛宵雅之
全盛譟鹿鳴與魚麗我其灑然念清平之物色辱曾
三代之英之未逮昔者天子以是月齋三日之先庚
禮皞帝聘該叔覽盛德而出迎爰始以三公九卿諸
侯大夫有事于西成之郊埒還則乘始肅而行時令
賞武人而厲天兵練桀俊專功能理審察訟端平詰
三水縣志

卷之四

九十五

暴慢征弗庭坏城郭叶畢星于是帝以微爽輕涼詔
學便旣徙總章而居左个厥元子亦啟瞽宗而踐西
清樂則羽籥禮有疑丞瑤白玉于閭席釋先師而稟
成薦穀麻于寢廟登廉深于殿庭尙古鳳凰以其時
至實中夷則而和鳴是謂天人休否之佳候抑匪獨
和仲之所宅昧而先營若曾諳孔氏麟經之義與厥
立名之不迨冬夏秋七月雖靡事事而必書則貴中
之指維允不然豳風八歌獨表十二政之首何居襲
一容之辯伯欲闕先王之時訓以蹈此迂也悲則悲
耳安知實沈氏之不笑以爲狂童之狂也且晞曰皇

乃覽揆以茲晨兮肆厥尚之清而不隘堅峻骨之肅
貞風悅者難乎其爲頑兮非其道卽祿之以天下如
一介日在翼實太微之所宅兮肆作經以與之配啟
實嬪于天得九辯以下兮厥調自西幽生更裁而贊
諸帝不敢負天生我之勤劬兮良獨覺新秋之爲快
匪徒說鈴之與娛兮實發憤抗西皇之運獄于天外
維時政之不我使言兮聊纏纏及之以詔誠

西極賦

文翔鳳

賦源詩顧詞人之賦濫風愧雅鄭衛齊秦厥響維
鈞生民皇矣之義茂諸余嘉二京三都之鴻裁竊

三水縣志

卷之四

卒六

惋其筆遲指盤也嘗欲摹兩京賦賓金陵王燕雲
補何李所未構獻之中書滕之石渠顧仕非秘閣
暇宅十稔碩志惟頌頊賦介受家夫子命撰我祖
冀公頌迺造斯賦案口系以亂蓋三千五百言原
本山川遂及高曾每削華存實汜無麇飾姑欲當
張之南都左之齊都云爾其賦曰

雖州典學溢顧越膺顧諷於西極子曰蓋聞提天綱
則七曜亘維抗壘釐則九澳環絡故搖光指泰華爲
標崙虛挹黃渠爲冠是用闢雄國於上腴棲陸海而
神臯咸京所以帶霓而踞矯首函夏也逖矣子北垂

之昨與窮陬離觀板屋是宅烏暇有菴藹之風駢羅
輿志邪堞踰重雉唐迫肆筵胡華氏之壽孫降崔也
軒高輕曾寶鼎龍翹商昆王季鄂不雲歆意者三才
不相喻與西極子憐然若噎已乃感輔喻曰姬余詒
女封禪之籍先柴而斂璧蓋取諸蒙也脩文德水繼
乃沉若亦尙厥宗也圖傲乎末流之督人吾子盍掀
昭破醒而闕大曙夫粵周南者亂以七月絃大明者
郟之縣陔夸鄧鑄而誦斷岐亦奚異來仍弓冶爲
田舍曰昔罔有聞也殆或狂夫輟之變不密失職鞠
陶卽晒戎翟五六錯趾其湊粵我篤公騷翟鄒陔實
三水縣志

卷之四

二十七

胥斯原於幽斯館觀於京師舟王造曹三單厚茲夾
皇邇過芮鞠止基造草昧而建侯披屯邇焉模規霍
繹舊爨勺匪親姬歷慶節衍皇僕曩以高南雲以公
叔延施千季適觀顧淑皇矣還資導諸岐沃至若桑
用三纜納用凌冰徹田爲糧覲土順工叶以景圭統
以君宗遂廓王制上探幽風曼哉休遐斯子且君奭
所以其勤績組者夫於是二公遺俗付諸彤管揚推
緒烈抽摠繼繼咸終之於滕簡爲雅爲頌以授籥章
祈季登蜡獻之維良澗處焉汧汧焉濯濯虹漚焉信
假以令終孕靈臺與碎離安得依然詡鼙鼓諫金墉

哉匪隋通嗜古亮靡究厥鴻崇也且夫幽爲西極隅
割四宇夏華博觀西行問土右碑上林巨麗續廡周
龍靈五廼徧於郇柏翳縣之內史攸分永元之紀立
號三濟盧芳制險吳鄧戈尋蘭臺漢書版章炳麟或
收中輔或翰騰垠橋唐湮宋狂獬有頻當柳八度入
井而深亭候鳥注辰次於鶉其南則峙仙寒廓雲門
甘泉凌兢璧犀璠璫通天露掌涓墮銅人朝廡焦護
晏次長都椽樂虎落嶠嶧曾敷其北則赤瀆長坂虜
虜蹕蹕旣靡迤之又隱韓之脈敦安定隄側泥陽嘉
叔皮之襟理駢北征以周章遊藝文以排碁涉穆流
三水縣志

卷之四

八

於彭鄉其東則堯門颺颺黜如綴漆壘嶠嶠甯窳
乍闢迤以菘蕘聯邈鬱律百物府之異芩菑屯都房
鬻角彝麇輪輪捫輿拽鬼靈瓌闐闐秦獻兵晉於茲
之闐姚萇構架魏樓嶙珣痛扶蘇之何辛乃畢命於
秦牲其西則塚以仁祖實惟公劉齋漆涇濁叩抱崇
丘三十七王職斯之繇嶢隄覺之摧嚙軒岨其梁
輶儼祠禴之燎燭踏烝釋之澣浮蛇八龍之連蜷詒
巫陽與蹇脩厥草則繁萋萑葦鬱蕝稂救瓜壺苴茶
稻黍麻稷葡萄夏擘辛蔑秋秀楮榮素莖蔭藹岑岫
山圖躡阼筐不暇受厥木則女桑脆棗莘桐張梨苜

松河柳櫛參差池鄒構栗刈文梓舉蕢桃筍明李鳥
則間關伯趙睨皖鯨黃動股振羽棲必疊雙蹠足縮
掌鴟獲鳥翔遊鵲糗紫提提疆疆益錄尚名頡頏參
差稚閨聆之流韻懌怡僮子繳之叱喪雄雌獸則三
狡蜀駮駮駮粉獠猓猓猓獠猓善狙覬貓竊毛狼
跋其胡跡躔力狄媿躔遠俱過如隨階俟俟庶庶紛
泊鮮扁似巒被郊於是掌堅冰距闕壑罌峯窳絃林
薄蒲志歸堦歡此匏酌滛滛乎靈產洵土伯之九約
物旣益只人亦宜焯是故焦寅談兵而友橫渠范育
儒行而注正蒙遺馨欬於空谷尚需楸於道隆至若
三水縣志

卷之四

九

敝邑之厭暑諸紆坦俛萊而處菸芑有墀左雞阜之
戍削兮携龍角而迎暉挂日毋於嶄巖兮象切雲之
冠簪踐古公之復陶傳寢簟於王津逾溘求之石竇
萬本棧碧落之莫莫紛曖曖以樽搏豐隆不克捷輪
盤莫之榻鞭列缺於决背斧盼蠶而琢闔胡載者以
官家豈泥蟠之潛遁右磯頭之崦嶼兮鏤溟馮之頰
思頤頤茹而盤渦兮黔羸彳亍以征斲中有稍源滄
淥兮如鬻何練要宛渾之循夷也役穿石而駢怒兮
固形宅詫爲文星邁則珉琇挺其肌兮又何必柎庭
山而餘震湖始迺燦礪礪之崢嶸其苜則袷翠屏兮

而乎剌窳百常蠹其干曇勃率而不可虜徙跂於是
長羸蒞止六遜蔡令挹蘭英兮亨筭俯牒垆兮展鏡
循羲叔之王軌浴剡剡以冷瀨其役則平行而都戴
我半川粟粟沃區暢并買其目胸兮田上上而壤黃
菊嘉卉兮九畹森喬植之千章徵地毛於華實彌三
岐與六莊隋曰隴川邑於此鄉唐置府兵介藩北疆
原而滋故川稱柳呂涌金沙跨虎渠采潦藻掣游絲
遂肇名於我里并列則穉露寶珠土膏則卷藁削迹
亦猶丸成貢甘於醴泉孔林第蒼於叢棘譜延十世
派蕃兩族朱戶聯振孫青門擅雅俗彼常曲尺五王
三水縣志

卷之四

一百

巷烏衣雖艷貲不逮然絜表葵裘展不遠遜頽膚也
若乃按八律以紀候勰四序於天歷汁乎通正蕩厥
綿繡風來花信霜前鴈白鼠化則萍生鷹擊則蟀躡
朱明芊兮旖旎白藏淒兮澹澈和王燭而平暢故足
尚也肆先民之紀曰幽惟與土銜墨乎雖生胡不括
囊其口取譽獲咎也哉爾旨典學佇貽鄰席分而申
訊於隱几日下走固匪固亦奚繇翫德馨悉魁殊擢
重性於錮匈攬華平之媼都將子無怠尚本右冑之
歲蕤誥玄靈而宣臚沆臣儷龍狽霏濡需西極子曰
珍茲客卿之詒金天摯鳳曆鳥官祇鄰子拈其梗概

蓋知祖疇若後先德韞韞後生之譽誰侑予美如之
何其轡虎蔚豹操觚如翮輒甘念宋祀也正考甫謁
周師得商頌十二奉以歸祀孔氏嘉諸銅川六葉咸
有述統諸王道願緝御駐景觀纓颺瞰聊成吾子之
雅蓋雒之靈聽曰蒼帝姬昌聖哲慈理故受命鶉火
垂黃演德經緯漢倬系之以文或謂文氏文昭之覃
與我不敢曰夸其敢曰徵至若錯紀後至於左氏種
奏七術於葛山翁聲循理於華陽潞國都元老於四
朝廬陵鏗正氣於陽九靈宿晨跡靡諫之宗姓志班
如元元厥支予之未覈姑以闕俟叩噓誰何阿叟越
三水縣志

卷之四

一百一

勝國以築茲膺黜兮靈矣稱海諱昌於我氏則大庭
乎蹠敝而稽昧昧漫漫如也天家初造鼻祖挺玉於
時匡衛之次端門西第一星明實惟右執法史佚北
之曰厥應睿直惠文公蓋副厥禎已荃抗性之碑宕
兮羞昌披以縮伸覽達詰以掇芳兮快諄諤之鯁襟
謂咎繇賡載歌兮尙叢脞而效箴胡季世之德思兮
如牂羊之就燔邀時好以捲局兮亦何取於乘軒吾
非閭媿之曼睞兮柰何便媚而色事人誠不能趨起
以容裔兮誓將逐方良蝮虺於無鄰衆猩啼而鷩笑
兮獨窳軼傑立於黃純不筵尊而裂麻兮皇亦未昭

夫徙薪於是盈庭繼嘉條呻組之三日下吏疇或咻
矣三日土擁謂不貯兮孤臣健骨氣彌煦兮拚檻之
雲豈伊尙汝出麾觀察功載萬戶繡斧金鏃宜公之
武何以方之三門底柱遺像儼如下民誰侮爾其督
匠而建文華也殿閣洞而陽開詔王爾命工倬西清
闕闕東序枚枚時青琬於璇題對岱輿之嶠嵬蕭公
未央權宜諧哉遂援華以名子兮志君渥而寵徠惟
華質之繩纂兮亦繼歷而非微或貴以季命之及猗
或少學而禱而迨東山之素封躬莘畊而自撝蓋一
華兮五葉索千庾焉遺禱裔夥够兮一炊萃家人之
三水縣志

卷之四

一百三

談談我高三索而外之秀萼尊尊以芝眉朴不雕坦不
歆篤廣平用肇基繫與曾考懿厥靈根元長體乾德
寓載坤負大壯履同人爾乃氣沛艾莫之淹也羈馘
倚若紫鸞突勒而軼輕塵才蠶鬻以披堅也摩厲倚
若華捧鈿爛塘溢冰釋之純鈞宛收收斐斐以左辟
兮初暉謁其暎春儻然徹四筵以駭座兮哢乎懸天
章之散金靡顛隕莫之極兮洵鳴驚革以迅騫也曾
賜谷之未熙遂弭節於洧盤當下階之上星拖長虹
於人間端夫喟其奪速蕊珠虛而待還泊冀公之降
無亦隋之黃潤與匪超有市之鄉實揚風烈之高燭

型邦人而陰鑄此亦赤堇之山破若耶之溪澗群神
下而天精布也肆允荒之居譽髦斯士賁而不昔鞠
也民之質矣恬而不昔黷也丙耀旣薰靡息而彌匪
私謚乎殆稟和善背矣故其誕也帝乃雅以鳳觀表
以龍章黃中其腴理五續其肺腸同合歡之蠲忿慝
交讓之單芳寢門則蓮甫撥風肉食則丹葵傾陽於
是探鳥策叩石記綜七緯而合經本九丘以窮志汲
冢譯其竹編禹碑跡其丹字賤結綠珍篆素嬉說鈴
擷書肆左徒之騷天官之史繼火申且不知改歲役
選唐於塹鉛綜姚姒之倫第總圓機而鏡九流操寸
三水縣志

卷之四

二百三

靈以踉蹌兮望女牀之咆危授陰符於驪姥仍赤斧
以歸萋促神州於一握謂韓衆之可攜超然顧四奧
而衽八鄙兮遂竭舉而投諸無莠之谿觀岳瀆之髣
髴齊豐确而壹平陂何元會之足季瞬溟淺於俄期
必凋三光而後老乃足异兮聳聳營營雖孤公亦奚
爲襪無機之船於彼荒唐津兮遺震旦之彈丸如委
衣遂焉謝徇華招僮儂紉玉笥注參同稟周易以沐
浴時候火於八風儻赤城之天隱貴王子之虛中垂
頽集兮琬琰代鼎湖之髯弓夫君子之澤五世始斬
歟韻之優積久彌皖伊余灸茲不承不顯是以緬其

三水縣志

卷之四

二百四

坐尚如月之珪伸要棄組筍籃杖黎醪醪百斗玉山
自頽則靖節之陶姝逼真也高妙之骨如含朝霞挾
詞綺散芙蓉水華鰲戴三山何歸天壇可以掃花則
青蓮居士固揖芬也買青山而辦錢躅空谷而蠟屐
俯流澄煩趾峻卜宅肯試汶汶以聖虛白則謝傅攜
演亦徽俞也監司雪風銓衡水竹小車輾苔蕙容畏
俗七耆健編含媚幽獨拈善拳服無名之樸則邵氏
天津氣姝親也若乃大竹端亮而達壺關恬逸而裕
天台沉淵而文原情顛鶴羣萼匹棠勒之訓斯駢萃
相望幹蠱用譽於何不臧肆若觀宇軒轅於蘭櫟三

黃蘖而景德綸綃賦華增吹於金闈非烟郁而慶喜
困輝大氏假墮祇昭隱虛庶靡罪悔烟熅可虞是以
我人孔將有那其居詩云嗟嗟烈祖有秩斯祐申錫
無疆及爾斯所亶其允諸小雅之材七十四人大雅
之材三十一人不聰而待叩我其釅哉辱客命訊爲
麤道其扶踈聊別於耳口四寸而已厥繕靈官而納
邳禱以溢我逸者實無由究圖也客旣酣西極之述
槩然興曰都序君臣則稱乎忠有宗祖則稱乎孝平
子二京太冲十稔光雍迪喆攪搜富已然張抑先漢
而侈東左尙逆魏而退劉華說茂誼幸終教於子肆
三水縣志

卷之四

一百五

而隱虔而實生民皇矣之故響與景炎固未艾又鞏
恁顛以大律萬嗣之亘三靈將用嘉黎

京塋賦

文倬天 邑人

爾雅稱乎鹵極毛詩列於幽風幽其當鹵之極焉
原陘之中公劉以之立國相陰陽之宜交風雨之
膏陟出降遷順宜而處處之故雅歌京師之塋白
虎通有京大師衆之論朱子傳有高丘吞居之釋
遂之稱都稱畿千里之邑號統名以京師自幽雅
始僕故儷左息十稔濫竽於王父世父雅頌得所
之餘以揚前列豈登高之才歟

幽國之壑禹貢曰雍州魁杓昏建於華之西北遼陞
交錯平地之滄繆總橐籥於子午故山自良結而水
自出瀏溯水則一經而九緯度山則一本而九丘稽
乾象爲鶉鳥井頭鬼目之在未按輿紀適黃圖天首
地首之上游界有五而太極樞輿於川半遼維九而
京丘獸據皇過之中洲東則祓禱故竟龍洞蜷連漆
沮環繞天子于畋嗣宮負岫芝朮之屢媵星下炤節
烈薦遷且石闕有司霽雨太子之廟王華有瘞衣冠
帝升之僊金炤地而有色王蘊山而媚川若何駸駸
乎馬闕溝何嶮仄乎鹿拳或飛雲琅天以顏洞石屋
三水縣志

卷之四

二百六

萬本其星聯神林肖塙之嶋峴峴嶮也屹乎岳岳而
隱天其內溪莒九節靈草五莖將離木芍鬱乎芊芊
而西則夕陽之墟纏屬於水許紫微挿空雲出如縷
开涇怒犇濤駛若弩城久眎於古公渠奚號以狼乳
邑名廣壽唐之漆浦明月岬峴皎然玉吐穆陵鴻闈
沆然地戶且濁浪九曲以淳其包抱乎仁祖紆峯五
鳳以鑠乎前砥厥石鼓里嵒蟠龍阜列凰羽當炭泉
之泗衡亦柴虎參差於隩府其間大谷之梨鼠梓之
搜棗如瓜而木如蜜咸翁夔於蔬圃此幽左右之兩
腋耶南則仲鬱亶鶉寶鼎雲卷甘泉爽眩金莖露瀉

至龍穿治水而成湫青鳥集通靈以闢殿且隱有三
下九陰鈴呀之重淵邊有三躋千仞律崕之平行姜
源翁蔚以垂青譽嬰豈出襟而遺錮僊盤剝蝕以鏹
光漢武何披襟於設讌內則七絕之赤柿罨乎坪甸
千實之丹若綴乎屋院其幽腓耶而北則馬嶺礙日
圍不窳之城烏嶠降雨鎮霧武之京珊瑚川迴龍穿
曲穴風月亭峻瀘環渠阮奉玉真於琴岫導聖水於
羅岬且九龍蜿蜒下治北塗之水久渟爲泓五柞扶
疎覆跡泥陽之堞誰膏成薨花馬之醴何產白豹之
川何清內則金絲之葉肺肺驅瘴以尊生菴蘭之草
三水縣志

卷之四

二百七

蔚蔚翳谷而駐精青梁味能消暘碧菽汁足解醒此
幽脈乎惟幽山川皆本於北陰握九谷之總萃中爲
陰陽之交合三才而定位京丘隨雞阜以岌嶮南岡
繚磯頭而屏翠皇礎泌澗而穆流其美過澗宛轉以
緝豕乎治八川百折而不迴浮隍啤以彭瀆此回制
之可名何臚三泉以表異諏郇伯之封黍苗帶膏以
漸漬覓魏王之樓震風摧木以披吹紀敕水於唐川
立仙驛於隴肄煙火簇變槐之屯風雨坻一松之寺
且金沙有泉炤人似幟白虎名峪生雲如簪故梁渠
述於丹淵廣延書於通志其中石壑先春而薦廟壇

合歡臨夏而蠲忿賴三妙華蕢之俱馨五粒葉柯之
借概持妍之蘋嬾嬾以有致多子之杵纍纍而徧植
淵山楸乎其梢滿壑挺其苦蕒雖側蹶之幽寂亦隕
區之善墜故古公陶復以宣理公劉觀京以立疆或
靈陰雨於四國或築雉堞於八王雲臺之將帥鄧馮
功成斧戕尖山之英絕勝岳績奏適皇春珍報國以
盡節飛卿著名以文章叔皮之行安定爲過郇邠之
鄉少陵之去延鄜曾入木水之墜蘭何生平窈谷應
有徒以尋芳抑京山師水之靈氲世釐以人桀君期
雄武冠軍向左谷而蹀血景瑜清白自操仕隨州而
三水縣志

卷之四

一百八

至潔國倚長城侯洛公擊高昌二十一郡以探虎穴
朝慶名臣漢丞相賜田宅三十六所來畊蒲澗湖厥
天倫文昭之列系之以文蒼姬其準若錯載於左氏
之書種杼乎葛山之舌翁治華陽而有循聲爲持吳
戈而欲背裂路公逮事四朝之炳麟信國經略六省
之水雪咸星宿之河源漸西流而匪竭九傳海而秦
晉之派分十一傳昌而郇幽衍縣縣之颺寃大庭之
崑躔其繁祉以不別辱我鼻祖挺生於洪武右執灑
乎端門服惠文柱後之纔第一稱御史大夫於匡箴
立堯階而指佞抽屈軼之鬻根折雲之檻以憂國

盆之旭以鑿寃金百煉而彌固王三炊而不燔三日
適吏直道自存三日土壘有天可捫京師頌其鐵面
疾風知勁草之騰騫朝端戴圭於正日罔不懼乎謹
言迨其督大匠以建文華正有子以翼燕廓峴岷西
清而閎閩迎翔陽以開墀廼命爾班司脩繕樹闕以
切雲律銀以布冑厥名昆以紀工志寵渥於上眷緬
質樸爲采地爰啟遂以白賁取無邪之中正爲經緯
天地之大文裕學續於千億導如升乎朝斯其壽隆
如東山躬稼乎聖高之上紫萬箱爲素封三邑之黔
敖以資饌賙釜庾於比閭活够人不期其價楸一本
三水縣志

卷之四

百九

其五枝芝蘭倚柅以遐暢萬生廣平岐嶷邁種課畊
以灋虞華傳經以追屈宋其縹縹不群也如出豐劔
華之干斗其姍姍以言也若舌根青蓮之人誦惟冥
椿而分四柯允王燭調春夏秋冬之四統故冀公應
乎孟春龍精以履歲首萬物奏地而勅升律必始於
太簇少撤拮以下帷漱芳潤乎文囿每試辟易夫群
英爲璜宮之傾衷都人士師厥儀型分角虬參虎以
如觀或振鐸比州譽髦斯秀冠挂神武而歸幽自爾
羲皇之宙鑄赤革之銅於一爐見雙龍蜿蜒以交走
是以儀部斂幟於一十九歲因文章而仕秩宗著書

以三十六緗建樂育而教西雖日講內聖外王之道
群瞻關西夫子之容矧詞林學富於二酉毫灑乎三
江東璧有圖書之府西京無星降之九杠享觀宇而
起者二子守尊天以來則十孫光祿圖南庚戌三陽
銘恩握赤璋於三晉提衡禮樂以不煩著青緗乎九
極潛心經世而立言且有子冠豁達如雪或賦詩以
五千有子惠司教西漢果作人於寒泉垂而補袞有
嗣克孝彼萱室軒舉承先振操夫花筆且建標於赤
霞能閔免乎前騰况賦爲古詩之流登高其可望史
爲紀事之才彤管亦有相哉又武城琳瑯之學摘春

三水縣志

卷之四

一百十

華於森園絃歌之響湛汪濊於東垣降而煥乎章雪
者隕紫鳥璜瀚乎氣駛者逞豪高陽惟觀濤之鴻博
留徽聲乎汝襄何奮甲黃雲之畔止矢志請纓展翼
青芹之際堪灑潤墨泓辱若大竹飛白以臨池函夏
欽其超香奚樛木之不容致維熊於無寢至壺關恬
雅有德冠國學以六行之譽肅靜以治沛霖雨於三
老之墟且館陶之哲洞竒門星律諸書博之以學務
種植竒羸其不踈孟有岐陽聽於樂之鼓及虞廷坐
臯比之與仲有翥羽集沱林之椹兼烏羸通畜牧之
餘其敬能紹庭食國之餼穎以過人晰乎烏綿媿伯

魏仲以肄三罔遠遜之可畏焉猗歟天台季葉之宗
歲功聊聊以待發如玄冥之嚴冬萬物棧通而始出
皆沕瀾於黃鍾豁如十行而一跡稱日角月葩之神
童癸未旭射乎金榜奏平成於司空曳繡袞而持王
斧巡行乎瀾東朝墊仰德音於鴻緒如兌天與稊弓
及解組以鹵返董農訓子於金衢王剎之中維祖少
蒼孝友性生以志爲養外則滌石之牖內則泣俞之
杖風木蘊葢其不辰鶴徠吊而親嚶水米不入乎齋
副葷醴以忼愴報蓼莪於三年結茆廬乎竊擴青鷗
巢偃蓋之松白兔育風隧之宕直指采風以上聞歲
三水縣志

卷之四

百七

頌粟布若高山之止印果君子其有穀裕餘慶於後
昆儂考以傳天之翅欲扶搖以舒緡何九萬里其未
展垂天之羽五鍛於青門施構櫨以掩瑾鸞糜餼以
調元元侍乎父則依葦而敦志禱乎鄉則撫謙而闔
敦八佰行圓而三千功蒲應介祉於雲孫冢則倬漢
而章天仙眷以持已仲則景行而子矜夕墜以淪汜
黍冢繩大叅之詒謀數躡金臺其何誦破藜狀以蠶
沒六經大淵獻克攜夫青紫指岫山湘水以明心罔
敵負名於司李攜兩衷之清風容與河干以自歎厥
後其克昌也望在田之有蜚能齟齬廉謹而自守青

其佩以娛闈庶作室其肯堂有松茂南山以感寐諱
厥享而爲崧瞻歆雲函雨之瑞靄曷有極哉若夫篤
公劉作京邑於溥遠而名川義將軍屯府兵於隴城
則稱府遠巘則展天眉近疇則廣地乳鬱兩澗之雍
雍剪三淵之膏膺出醴泉而井多列其列黃壤而薑
竄沃土前碕氣聚於佃翔之壑雞右渠風藏於敦圉
之峪虎於是申秩祐乎無疆蕃本支於烈祖衍兩族
之原著十世之譜如史有司馬紀世緒以堯而下傳
四世之孫姚以舜而上傳四世之祖禹譜有歐陽圖
世譜自詢至琮餘二百季爲四世之宗自琮至觀僅
三水縣志 卷之四 一百一
百季爲十六世之數雖兩君子之紀季猶漻曼其無
矩維幽之壑川谷訐訐姬曆閱墜老而萁荒豈曰未
艾之澤爲小補

幽天石隱賦

文龍軒 邑人

尻子午吭京堊艮山坤水之隈石纍纍焉迤邐蜿
蜒嶙峋如華削者連斷以由旬許壁腹復陶萬本
厥竇不審自何代但鑿痕尙齒焉如昨想前人辟
敵潛身之奧窟選其竒贖無如趙川之名官家者
突兀三百尺至不可仰余洞對焉相峙如屏上有
石廊數十武眉月收星爲更勝題曰琅天兩洞峙

旋平陸而斲花竹卽家青夫子之誕於相下處自
滄桑以來余父子巢石深隱詫天半之樓閣者十
八星霜安可慳片言以報山靈

猗咲日月讐殼天地斤斧霜露衣裳烏犬君子山河
碎裂茫茫靡止爰有破荒媧臂之人劈石翫掌之舉
彼六甲遯五丁死誰其驅鋒飲鏑捫山面而借墟竅
山骨而闢路豁山腹而張宇高高下下爰居爰處厥
狀匪一而咸莫敢侮厥狀維何拔地倚天獅蹲象立
鼎踞龍盤珠穿九曲鰲戴三山崖屹劍閣頂魏雲冠
旣嵌空以玲瓏復霹靂而崦嵫上耕層畝下逗重泉
三水縣志

卷之四

百三

神足琅只一夫訇然非羽民其莫到雖趨猱亦愁攀
爾其聳窈悅人也月臨窓而自近河入戶而平懸沆
露墜玅醪而滴甕落霞飛皎姬而窺簾風咳沙而咲
王指控寤與乘鸞鬢流吼鼉疊嶂雕烟攬晴陰於衆
壑雷眠砌下聽笙竽於萬籟鳳起林間疑化城之幻
設眞壁貫之神研世兒無所競榮辱上界何由辨仙
凡其呼吸可通者不盈咫敢碎然携眺詩而問青冥
於虛無縹緲之巔九潦不浸十日爲燃遊不數七十
四脩何事八萬三可以低秦嶺小渭川卽有竊盒客
截鐙手鼓橫磨以博戲詎能窺我九鼎上之一斑攷

於炎劉盧芳守之以拒莽傳之有明中山攻之以保
元厥功用之靡常以神變之殊端余太古小年於其
中者越垂髫至如戟將伯仲而甲乙之但見笛關山
兵艸木之總不能魚貫而鈎撥貌其音關渾古哲崢
嶸而岳嶺寫其迂崛肖雄英磊落而泥蟠竝而爭之
大鵬希有之翱翔比而肩之東公西母之鱗鸞居然
大雄王而小雌霸信其左瓊池而右藥淵斐華拱闕
兩室開筵猗玕失與勾漏不仙磨琅瓌以幾字歸二
曹乎一拳惟其亘長秋閱大春故能藏六天九極之
奧衍而據幽山之第一雄巒豈比夫鳳臺之堙爲齒
三水縣志

卷之四

二百十四

徑而武陵之迷乃仙源來青杖而不驚遯黃華而益
堅實礪齒於西極安捷步夫終南洞告我曰白石已
歌桂樹潛踪稚川安在弘景誰榮媧腸千變羨腹萬
重一屈一伸爲地爲龍痼疾不治其如蒼生時乎不
冉冉冉脩名舍爾秋實溷我谷空愴公劉旣鑿我之
混沌子文學又重我以剽踪誓將返璞還我真形余
曰不然積氣積塊覆載無窮覆載之中蠻觸蝸爭長
天一路絕少人行奔日奔月尙藏其躬胡積雪三百
以自守而躋池者踵至胡積高五千以自岍而柴望
昔筭通子於太空亦焦螟之於蚊睫奚強立萬古而

經經將子無徂我特以酣霜老樹之管樹之槐眉令
後之鈎公迷野者代群王與樊桐

三水縣志

卷之四

一百十五

歌

弄石子歌

幽石子五色

文翔鳳

邑人

欲餐石子疑松子漱之不徒堪礪齒棗乾初上姚坊
門新壓櫻桃差可擬千日坐蔬乏清供晨昏止飯脫
粟米十蕘粒石列案端每食如饌青鸞髓山人濯石
不濯纓羽水探月秋而洗一寸琅華當洗心五色交
縱光射起弄石因之得石理大如榆錢小胡麻亦復
有根綴蟻甯洹河淺沙細於塵粒粒成山終磊砢安
知百億蘇迷廬非我掌際殘沙子

田家禱歌

文毓鳳

邑人

三水縣志

卷之四

二百六

阡陌日以廣子孫日以多丁男立門戶有孫解吟哦
尚頌庶可畢園涉聊養疴忽念東作人亭午方治禾
荷莒戴黃笠裹饌踏青莎芒屨曳微徑南山雲嵯峨
惠風蕩中野衣袖弄婆娑西鄰有素心日暮邀我過
相見便登席何用禮為苛眷言酌春酒解衣掛欄柯
發言豈皆頌道在頤天和醉臥松根下朦朧驚牧歌
覺來動長笑天地竟如何

幽地成幽字跋坂歌

文明冠

邑人

跋坂骨節重勞坐知身輕杜老皮肉空峻坂我緣峻
坂骨節騰強骨強筋須峻坂精堅氣府走如嬰神驗

不勞非肉馬汗血始能空千城往來三澗知天遠深
暑深入炎火罌幽地乃成幽字險勞勞兩豕挾山登
豕豕山中不善陸嬰憂豺虎艱不升豕山多坎生幽
字允荒之居苦營營土瘠民貧惟轉粟金生粟死勢
如崩王稅如山不可恤峽中豈知豕艱豕不勝策馬
尚憚馳荷擔曲軀者蜀道故登天走幽亦畦夏出門
寸寸必力攀追道委蛇不可下西北積乾多峻坂峻
坂之天蓮花社齊天無地總蓮峯蓮花心衷竟日夜
積乾實爲幽字祖怒水聲濤夾澗瀉幽荒具體亞積
乾幽爲乾尾歌二雅當午泥汗不可灑沒盡幽荒始
三水縣志

卷之四

二百七

平野輪轂烏得猿臂疆惟穡稼赫霖猛颶不得舍山
靈普滂雨田祖無容蜡爰地重坎多豕水豕中之豕
千坂壩驅驢盤陡運豕流千仞之峒百盤跨之廻之
道方如亞咫尺百步蛇爲跨惟有勞坐始身輕坐後
不能跨鞍馬路重安得身如葉千斤入骨真負鐵峻
壁之滑冬溜雪翹冰惟欲虹繩掣秋霖夏恣泥不挈
千摺之攀力竭氣更噎強筋強骨大凹凸皇過之詩
咏周疆大國從此都岐陽王業已根幽土造本得壑
豕農功強古幽富饒施仁登帝皇豈若後世之幽豕
地枯且僵蹇足日日曲山梁萬戶之藏無積糧

幽谷歌呈

林彙菴明府

戈

時廣德人

舟王公劉初締造膏苗郇伯繼封膺未知夏代脩何
業似比周肯較夏貧羅列四山山有異得名三水水
無隣東西度澗趨南郭金玉湧泉遶石門猗崑厓峪
開官洞雞阜凰隅對翠屏雖隸雍州多險瘠最傷下
土困科徵紫氣關中馬屬望清名海上是前因風行
艸偃當斯任地與人違叩彼旻敢效蒲鞭矜惠意猶
虞蔬食損廉聲感君暫爾烹鮮奏嗟予奚由策蹇經
德慕耆英空過衛才慚季子亦來秦遺恨扶蘇千載
廟留題鄭谷五林邨予且倦飛休振翮相期高臥爲
二水縣志

卷之四

一百一十八

招雲

幽外史曰志紀事實匪擷英華而終之藝文者奚
居曰藝文雖雕蟲小技然文以載道辭以立誠詩
以言志氣運之盛衰學術之醇疵胥此乎繫焉三
代以上道德政事文章出於一其發之詩歌文詞
皆有關於風教有裨於民生如日月之經天江河
之行地可久而不可易後世道德政事文章裂而
爲三縱雕繪組織誇多鬪靡譬剪綵爲花生意終
索然耳蓋文肇於墳索盛於典謨訓誥而衰於魏
晉六朝之駢偶俳優詩原於賡歌委於國風雅頌

而亡於顏謝沈宋之選聲諧律屈靈均之騷古詩
之遺也迨上林子虛之賦作而騷幾亡矣長楊校
獵之賦作而賦併亡矣何論平子之二京太冲之
十稔乎莽大夫劇秦美新賦雖工奚採於投閣至
太公以擬易法言以擬論語則聖經之摻懿矣豈
僅以艱深文淺陋而嗤其覆醬醃哉故嘗論之漢
無文章惟武侯出師二表晉無文章惟靖節歸去
來辭賈晁以後無奏議惟陸敬輿諸疏三百五篇
以後無聲詩惟陶彭澤一源之三子者以正詛明
道之學摠忠君愛國之言皆從至誠流出而非摻

三水縣志

卷之四

百九

險抉恠字雕句鏤者所可同日語也茲以幽論幽
風幽雅幽頌爲姬元公所自作邈哉不可追矣班
叔皮之賦北征李青蓮之歌幽谷杜少陵之咏木
末鄭若愚之唵金泉幽之過客也其產乎幽而以
人文著者如范吳之序橫渠正蒙首闡理學宗傳
文太青著幽易幽考幽賦幽防等編足覘邃學碩
畫又如少白鉅賦太青西極秋賦諸作蒐富二西
探竒禹穴雕龍吐鳳擲地當作金聲儻所彌登高
能賦者非耶乃若幽之邑宰求其學之正性之誠
而以道德政事發爲詩疏文章者我林侯而

殆未易數觀焉蓋我侯之家學有本得於其
曾大父潛江先生及尊公素庵先生者深以遠
也潛江先生歷宦吳越齊楚滇南所至政聲籍
甚民皆尸祝其佐鄆郡輯脩郡志年九十猶手書
程子四勿箴以教子孫素庵先生以銓部講學
筍堤倡明旦氣所著弟經經史釋義易史象解春
秋易義諸書久已衣被海內學者稱爲筍堤夫子
特祀學宮一皆及門多賢士大夫至今掇巍科顯
當世遑遑不絕也我侯夙承庭訓蚤通經史年方
舞象卽登賢書癸未上春官誤中副車筮仕襄武

三水縣志

卷之四

百十

首陳捏報墾荒之弊詳請題豁故秦屬蠲免一案
民蒙其澤者實自我侯倡之已酉蒞茲土慨然以
風教民生爲己任振百廢而具興之其政蹟之赫
赫在人耳目間者黃髮釋齒能言之至於生平著
述之富類不能殫載特錄其有當於幽者著于篇
今讀泮宮告成一咏而見我侯之理學淵源有素
也讀舟翠同亭諸咏見我侯之言志本乎性情非
虛侈葩藻也讀免賦免徭諸詳議見我侯之立德
雖羽檄交馳不憚爲民請命也讀防禦訓練諸詳
議見我侯之立功在殺賊全城不僅脩廢舉墜已

也要之我侯忠君愛民之誠可以質宣公之奏議
焉可以當幽圖之上獻焉宜所謂道德政事文章
合而爲一者也宜所謂有關於風教有裨於民生
未嘗有意爲文而天地之大文不可掩者也若夫
纂葺邑志以垂一代之文獻又不厭討論之勤與
脩飾潤色之詳焉筆則筆削則削旣一詞之莫贊
善善長惡惡短復一事之不苟以春秋之公心行
龍門之史筆尤以見我侯立言皆有功于風教民
生之大云是則侯之德也功也言也固與幽山之
高幽水之長同做天壤矣美超一胄士民之口碑

三水縣志

卷之四

百五

云哉後之覽斯志者其亦知所折衷也夫



縣志跋

蓋聞秦韻周舊而周源於豳是豳爲周之始秦之所以夏也

宣聖刪詩以豳秦二風並列則豳雖最爾然上下數千年賢聖胚胎之所風教人材蒸蔚代興可令湮蔑無稽爲山川滋怵乎

跋一

則志之不可少也三水之志缺有間矣前者雖有成書而草創伊始未免簡陋我

邑侯林文師下車以來百廢具舉乃於羽書旁午之際兵燹頻仍之間慨然曰邑志不脩遺蹟未聞下無以定月旦之評上無



以備輜軒之采斯予之責也夫
於是博集簡編考徵故寔手定
厥稿屬鄉大夫文倂明先生余
姪孝廉壯猷及諸生四五人小
子俱亦濫竽其中纂輯參訂系
四月而成焉於事蹟則削磨存
寔於藝文則酌古衷今爛然杰

跋二



史公之遺制也至於爲民請命
諸篇諄懃詳切痛哭流涕之苦
心橫溢楮上覽之不禁掩卷興
嘆則茲志非特爲紀事之書寔
恤民之書也是役也一切工費
出之于橐不曠日不損民不煩
借才遠聘洗碑苔端雙畫象渡

並衡而較奚啻霄壤不其有究
我邇耶俱於是有感焉夫志之
脩也大約在昇平全盛之時而
三水分縣在明成化間及萬曆
而始有志是前此未曾脩也書
瀆之善也必得博雅大儒總其
事方勝斯任猶聞文太青公有

跋三

言曰予生平恨事獨縣志未暇
修爲缺典是逸此未能脩也獨
計莽此歷成弘嘉隆之盛世未
徵文獻逸此聞少白太青之巨
筆未及編摩而
林父師具三長任五難於政事
叢劇中殫厥心力郁、彬、勒

成一代之書後之觀風京塾問
古豳亭者不遐有佐愚小子輩
不敏不過塗黃刷穎挹餘徽于
凌英上耳何能贊一辭也耶

邑學生張 侯謹跋

文崇袞
文龍軒

跋四

馬三錫
王達可全薰沐書